

養  
一  
齋  
文  
集

養一齋文集卷第十二

武進李兆洛

墓誌銘

慶陽府知府盛君墓誌銘

君姓盛氏諱惇大字甫山先世金陵人明末始徙武進之南華聖今爲武進人也曾祖嘉烈祖衡舉經明行修補江浦縣儒學訓導父綱乾隆乙丑進士歷官山西絳州直隸州知州陞湖南永州府知府未赴而卒母馮夫人絳州公三子長惇崇乾隆辛丑進士歷官甘肅布政

使自曾祖以下贈如其官妣皆贈夫人季惇復以謄錄  
議叙歷官河間府知府君其仲也乾隆四十五年

南巡召試賜舉人授內閣中書再丁內外艱五十八年  
始補官前後倣直

禁廷者三十年嘉慶十六年轉內閣侍讀二十年轉江  
西道監察御史卽條奏養濟院常平倉社倉積弊請查  
辦附奏常州府紳士舉行積穀會請下該省巡撫嚴定  
章程以保久遠皆奉

旨嘉允二十三年

睿皇帝以風疆之異詔廷臣直言時方

幸奉天謁

祖陵君上封事言蹕路夫役之苦即日奉

旨豁免順天府所屬州縣錢糧并

勅查直隸被災各州縣分別蠲緩又以

萬壽恩詔赦積年民欠君言民欠或吏胥影射請酌免  
新賦十分之二以普實惠未報會四川省奏合省無民  
欠奉

旨捐新賦十分之二他省無民欠者如之又條奏吏部

吏胥舞弊宜釐剔奉

旨交部議奏旋奉部駁然郎官之素精吏例者見之皆  
咋舌二十四年二月授甘肅慶陽府知府府在萬山中  
號窮僻或欲留君省垣伺機會換善地君不可以清省  
爲治官厨蕭然苞苴悉絕撫士民有恩而嚴於馭吏部  
中便之在慶陽五年一署平慶涇兵備道道光四年以  
年滿七十請致仕旣歸子思信方官江西之樂平縣迎  
君就養其明年正月十六日卒於樂平官廨年七十有  
二四月初四日喪歸十二月初八日祔塋於皇里塋終

州公之阡外昭穴君好善如不及尤勇於見義聞人一  
能稱之不容口視兄弟之子如子延師課之以次取科  
第鄉人士之至京師者無識與不識以緩急告必响濡  
之或視其才之所能而成就之於仕宦無絲毫營競心  
然甚能敬其事心之所疑博稽於人久而不釋工書畫  
暇輒以之自娛人或求之初不拒亦矜慎不多作笑語  
煦煦溫克終日或規其過語至刻切難受君未嘗不婉  
謝且深自責也余齒少於君十餘歲嘉慶乙丑赴禮部  
試始識君一見輒相契旋延余於所居之南墅課其子

朝夕甚歡余性既坦率以君相顧之厚益不自匿被酒  
放言往往及塾以外事而君不嫌戊辰余改官知縣君  
置酒餞之從容言吾不敢弟畜先生然私心相愛不能  
自釋竊願先生之兄事我也余曰兆洛鄙世俗交故未  
嘗與人稱兄弟行如君則何不可自是以兄事焉比予  
出都停車南西門廉已曛黑君追送之坐邏舍階上執  
手問後會城鼓將下匆匆就車相別念之如昨也而竟  
不得繼見矣悲夫君娶母氏之黨生子三思恭國子監  
生先君卒思騫原名思寬國子監生思信嘉慶丙子申

式順天鄉試道光壬午

思科進士卽用知縣署江西樂平縣知縣河間公無子以思信嗣焉女二長適國子監生溧陽史勳次適嘉慶己巳科進士現任順天府府丞同邑龔鏜孫六人肇齡長齡錫齡保齡昌齡壽齡思騫思信皆從余遊者也來請銘銘曰

有識不襮有才不鬻其處不賣其天不琢謂之未施言庸政埤謂之已施孰窺其涯委委虵虵達於無疵於稽其貌懦者愚者載儀其心博也厚也歸復於土蓋如其



真斯蘊斯培以澤後人

東湖縣知縣洪君墓誌銘

君諱飴孫字孟慈又字祐甫北江先生之元子也先生以氣節震天下君能繼其志先生以瞻學博聞迺後進君能嗣其業先生以詩古文辭發揮道德導播情性君能承其規勸卽沉敏嗜學不厭聞見旣洽心力尤銳每旬月不見過其叅搜其案纂述者已盈寸矣撰世本輯補十卷三國職官表三卷史目表二卷毘陵藝文志四卷青埕山人詩十卷皆成書漢書藝文志考隋書經籍

志考諸史考畧世本識餘各數十卷皆未成嘗聞其緒  
言胸中所願爲而未及措手者尙倍於此中嘉慶戊午  
江南鄉試舉人四試禮部不售乙丑己巳甲戌皆以薦  
卷挑取

國史館謄錄旣默默不得志而北江先生捐館後家益  
貧乃以謄錄期滿議叙謁選得湖北東湖知縣在任有  
惠政抵任八閱月遽卒年四十四嘉慶二十一年七月  
十六日也君體氣壯盛工飲啖耐勞苦值其發憤窮日  
夜無倦容徒步日可百里擇交至嚴不能爲唯阿處衆

中凝然莫窺其涯志合者傾倒如不及君卒之歲予方  
自安徽罷歸過魏贊卿值其不在坐待之見案上訃狀  
訝其字以爲偶同也卒閱之而信失聲一詫涕淚直墮  
嗚呼好學者理固短命乎抑亦數有不可知者乎君娶  
於汪子毅曾孫承敏承定毅曾愿而能立斐然向學蓋  
克守其業者以道光五年十二月二十四日塋君於德  
澤鄉前橋祖塋昭穴先世具北江先生年譜故不著銘  
曰

嗟乎祐甫疇子刻也金之玉之沙礫之匿也又亟毀之

抗之力也其身可埋光不蝕也道固有否吾黨則盡也  
視此四尺終古無泐也

蘿簪高先生墓誌銘

今之世殆無所謂師儒者矣謂之師者授句讀效佔畢  
也謂之儒者司載籍守黌舍也而世亦遂莫克自盡其  
職甚者以相訾詆焉嗚呼師儒遂無所用於天下耶吾  
師蘿簪高先生幼而勤敏篤志嗜學家世儒素未弱冠  
已能授徒以給仰事年二十二始補邑弟子員從遊者  
日益衆爲教以敦勗志行爲本爲文章一軌於法而隨

材善誘使之鼓舞不倦每根究理奧指示利病神色亶  
亶聽者心悚意浹油然遂然日進而不自知以故出門  
下者雖愚鈍無不各有所就其工制舉業取科第及爲  
弟子師有聞於鄉里者僕指可數年四十七始中式乾  
隆戊申科江南鄉試庚戌科登中正榜旋奉停止之

命凡七應禮部不遇以大挑二等嘉慶七年選授含山  
縣學訓導含山介廬和之間頗僻陋十數年來無舉於  
鄉者先生至則招來生徒發篋陳策課之督之擇其材  
者獎勵輔掖束脩以上來者不拒向學蒸蒸日變月化

甲子鄉試含山中式者四人自是以後科無虛額應

召試入中書與館選者接踵而起安徽莠民舊有天地  
會之目以煽惑愚民有司已入告而誅夷之矣卒不能  
絕根株邑士有以告者先生立移令察究而自爲條教  
以授諸生使遍曉之破其惑嘉慶二十年教匪方榮升  
滋事總督百齡嚴治之棟連相坐及禍者數百家而含  
山晏然無一人嗟乎觀先生之所設施則師儒之所以  
成就人材神輔治化者果何如也先生以貧故常爲四  
方遊里居教授之日少及得司鐸又值僻小邑故其著

見者僅如此性方嚴不苟言笑義利之辨斷斷一介而引掖後進怡愉見色貧而好施見義必爲達於從政肆應裕如淮揚道曹訥菴恒初爲桃源縣丞延先生入幕言論傾契因爲兄弟交曹君歷官十餘著績宣防先生佐之也在含山時或以公事謁上游有所開陳必中事理上游屢欲以知縣薦力辭不受遊必擇交不妄許可里居與周山畫情黃耑孩向榮謝蔭棠椿趙乳塘澧諸先生及先大夫友善皆落落難合者乾隆甲辰乙巳先大夫延先生課兆洛兄弟獲侍者二年以後蹤跡稍濶

而廿餘年來歲時音問未嘗間也誌先生之墓其敢以  
不文辭按狀曾祖靖安常州府學生祖頌昌考士宏  
救贈修職郎含山縣儒學訓導本姓金以從甥嗣高氏  
配楊氏繼室秦氏俱封孺人子承鈞承錫國子監生承  
鈺縣學生孫六人先生生乾隆七年十二月八日以道  
光四年十月二十二日卒於含山學署年八十有三六  
年二月二十日塋大寧鄉白茅塘之原銘曰

師學爲君儒惟人需鑄人陶化古今不誣大被寰宇政  
敏蒲盧小效鄉國響捷鼓枹用有廣狹道無二趨嗚呼



先生於遇爲屯於道爲亨鏗鏗一經馳聲漢廷彼伊何人曾不是聞幽宮于祀德馨不已以慕以思學士之砥  
旌德縣知縣陳君墓誌銘

江陰陳墅陳氏以元之中葉自汴徙江陰四傳爲明僉事橫江公臯謨以劾權貴被謫卒禦倭南都以死勤事祀邑忠義祠是爲君九世祖孝友潛德崇祀鄉賢邑庠生燦高祖考也

皇朝康熙丙戌科進士翰林院檢討廣東學政均曾祖考也候選通判鑿祖考也

敕贈文林郎太學生世濟考也

敕封孺人夏孺人妣也君諱柄德字伯謙又字吉甫幼  
聰敏博涉多通弱冠餼於庠乾隆丁酉歲選拔貢生朝  
考一等第一體故癩以病益羸引見未用是科拔貢如  
韓尙書對姚方伯合儀皆在君下韓以小京官姚以知  
縣洊歷華要而君不遇充四庫館謄錄書竣議叙得徐  
州豐縣教諭豐濱大河歲有水患君奉上游檄簡稽戶  
口給發賑銀晝夜風雪中不以爲瘁積三年郡守言狀  
於藩司以堪膺民社奏引見授福建崇安縣知縣以親

老告近改選安徽旌德縣知縣嘉慶十年蒞任十二年  
委解四川餉逾年始還十五年又委解福建餉君之治  
縣也撫字善良惟恐傷之鋤擊強豪不顧叢怨尤慎於  
刑名有所驗檢不假手吏役斷獄比罪必求其情三反  
晝夜信於心而後已既得其情卽不肯唯阿上下性又  
方嚴簡於酬對以故不申上司意同列亦無推挽者往  
往以事謫之府檄省檄絡繹奔赴四年中再委餉差往  
還輒彌年歲星霜之苦防護之憂資斧之竭蹙况瘁百  
端卒以忤上官旨藉事被劾以去旌德土豪朱則治者

與巡撫胡公克家有舊橫於里中偶不嫌於族之出戶  
家人李滿使其奴縛毆之垂死而召滿之父使領歸已  
死則謾曰其父縊殺之其父脅於勢不敢控則治之族  
朱義憤而鳴諸官君往驗毆傷累累也坐則治絞抵挾  
勢爲闢說者百端君不動未幾而又有汪五貴之案邑  
民汪松控其子五貴被殺於紫清觀前田中方萬幅兄  
弟三人實殺之時君以公事至郡中鄰封涇縣徐公豐  
代驗屍在田中而地上身上皆無血汗一刀置其旁亦  
鏽澁與傷痕不合君旣旋署復詣其地勘之則見汪五

貴所居血跡狼藉汪松雖主控而應答指畫皆汪長春者代之問長春何人則松之族而事松爲父者益疑焉返而鞠之盡四十三晝夜始得其實蓋五貴之妻梅氏有姿色長春通焉松之弟栢亦通焉長春業屠家少裕五貴藉婪索之不稱意或毆辱之長春不敢校而私憤焉長春偶與五貴口角松解之留長春宿其家長春中夜起將從梅氏則栢與梅氏宿而五貴睡其足益憤潛出挾利刃伺之黎明五貴起將出戶長春迎而劔其喉勢過猛五貴仆長春亦仆栢逸而松驚起長春知不能

逃因頓顙於松曰若子已死報官則長春亦死梅氏發官賣一家破矣若宥我者長春固翁義子也事翁姥終身是無子而有子也不然長春到官必盡揚翁姥之醜松覘於其說曰然則奈此嚇然者何長春曰紫清觀方萬幅兄弟吾讎也其觀前田卽五貴所耕也置屍於田而以萬幅謀殺控則吾讐可報而五貴不徒死矣松遂從其計焉讞旣定乃出方萬幅兄弟於獄拘梅氏起寃刀獄立具上之郡太守左公輔改奸婦梅氏爲呂氏其姑也亦與長春有奸太守惡其導奸故重懲之案未招

轉而呂氏縊於宣城之獄汪松子死妻復死媳亦不能保又一家蒙醜聲朱則治之族從而怨思之乃購人赴都察院翻控案至省檄君與左太守會鞠松狡悍執不服問官以其屍親也不敢加刑左太守因稟胡撫軍請奏辦奏辦者外省案有碍不能行者則先參承審各官解任嚴辦既奉

諭旨則案中不論何人均可刑訊也撫軍因之徑以奸婦互異奏參革職比定案入奏一切情節與君原辦畧無出入惟以呂易梅因呂已死問者不得不爲梅開脫

耳例可開復原官而覆奏以該縣誤聽汪長春誣扳良婦幾陷重辟雖經隨同審明究非尋常錯誤可比業經革職無庸再議君遂失官嘉慶十有八年也而朱則治始擬絞決繼改絞監候又援

恩赦減流納錢贖已從容還鄉里矣自古刑獄之慎無如我

朝罪自徒以上由縣而府而司而撫悉其聰明緣情定讞詳且密矣迨奏當之成其麗於死者

皇上復令部臣研核擇其可矜可緩者以聞於勾決時



卽與緩勾好生之仁如此其至也封疆大吏奉宣

上德州縣以獄上有不當輒駁審州縣亦自顧考成罪人卽與死比必稍易情事令人輕比而狡悍之民亦遂窺見此指脅持州縣州縣往往縱釋有罪以就之漢之時獄吏利人之死非憎人也自安之道在人之死今之時獄吏利人之生非愛人也自安之道在人之生一罪之成自勘驗購捕研審招解其費數百金而不足也或犯供偶有翻異上司別有意見駁案再審於是發犯回縣或檄調至省其費不可知矣其不中上司意者則情

罪不符辦理不善比擬失當皆可入之彈章百喙不能  
辨也兆洛與君同官安徽去官後同羈於省城聚處者  
數月故能知其詳而質言之意亦今時州縣吏所當敬  
而聽之者歟君去官數月而夏太孺人歿於官署君素  
有目疾官事顛倒不能無鬱鬱又突遭大故號泣孺慕  
目漸失明復以交替爲後官所持留歲餘賴宣城令查  
揆合肥令陳斌稍俛之乃得扶夏太孺人之殯以歸君  
工書出入蘇米而歸之顏柳以畫沙印泥力透紙背爲  
宗揮洒不倦求者無靳爲詩取自達所見無所規仿而

真氣彌滿著一峒山房稱若干卷既里居與故舊黎老  
時時杯酒流連未嘗及官事暇則命子弟讀經史以聽  
之復十年道光六年三月二十八日卒年七十六配蕪  
孺人生女子子二繼配王孺人生丈夫子一祖望女子  
子四其季爲前湖南巡撫左公輔子婦卽前寧國太守  
也孫四人英範俊範星範叙範祖望孝友績學工書能  
繼君之志以道光 年 月 日葬公於花山陳皮隴

九世祖橫江公之阡而兆洛爲之銘銘曰

此清疆古賢橫江僉事之阡也有賢子孫踵武側側來

親來敦體魄其永安

鄧君石如墓誌銘

鄧之先以國氏至高密侯禹爲漢宗臣支祚蕃育世有聞焉君字石如自號完白山人名與

睿皇帝諱下一字同故以字行其先自江西鄱陽遷安慶府懷寧縣之白麟坂至於君十三世矣自祖以上皆潛德不耀而學行篤實考諱一枝號木齋博學多通兼工四體書善摹印性兀傲不諧於世行遊客授獲糈薄屢空晏如君少以貧故不能從學逐村童採樵販餅餌

負之轉鬻日以其贏給饘粥暇卽從諸長老問經書句讀又摹倣木齋先生篆刻及隸古書弱冠能爲童子師見生徒憇跳卽舍去刻石印寫篆隸鬻諸市梁聞山先生嚬者以書名頽鳳間見而賞之介諸江寧梅石居鏐梅爲文穆公齋多蓄古金石刻石居雅重君盡發其藏以資觀摩業益進久之木齋先生沒旣塋君乃襍被入越遊天台雁宕遵新安江遍覽黃山三十六峯逆旅中邂逅金殿撰榜竒其書館焉時吾邑張臬文先生尙未遇亦館於金一見傾倒繼又傳容於曹文敏公文塩文

敏公又以書介諸畢尚書沅尚書開府兩湖稱好士尤  
重若品留歲餘以其閒登衡山訪响嘯碑泛洞庭望九  
疑其歸也尚書觴齏商使爲君壽橐中裝且千金君歸  
買田築室延師課子姓爲室家計頃之渡河登東山遂  
至京師欲以篆籀古法劇切時俗公卿多非笑之者惟  
劉文清公深器焉乃遊盤山西山謁昌平陵而返自後  
時時客遊踪止大江南北而已君修幹美髯魁偉異於  
恒人沉毅寡言笑遊四方所至必物色其賢達士及搜  
求古人金石之跡以自考與人論道藝所持侃鑿絲毫

不肯假借布衣棕笠賓客公卿間岸然無所訕也出遊而歸囊中貲先以周三族之貧者又以貲貸匠氏使製棺槨凡不能葬者隨取給焉弟懦弱已析炊矣婚嫁事仍身任之弟沒教其二子如子嘗與書曰讀書須極熟然後得尺則尺得寸則寸久之自不能舍我少時未嘗讀書艱危困苦無所不嘗年十三四心竊竊喜書年二十祖父携至壽州使已能訓蒙今垂老矣江湖遊食人不以不識字人相待甞能讀書獲益如此汝輩可不及時自勉哉父母不足恃家業不足恃自己氣力不足恃

可恃者讀書明理存心忠厚而已嘉慶十年十月卒年六十三配同邑潘無出繼室鹽城沈生子一曰傳密女四人皆適士族傳密生六年而喪母又四年而君棄養厝君於白麟坂上傳密長乃卜吉於某原奉君與二配之殯而合葬焉距君之沒已二十有餘年君之書真氣彌滿楮則具備其手之所運心之所追絕去時俗同符古初津梁後生一代宗仰世多能言之傳密從予遊日久原君所自述及聞諸故舊所傳道者爲事略以示余余故撮君之質行而序焉銘曰



望之岫岫卽之肫肫綜之紘紘理之彬彬一以爲古異  
一以爲今淳是匪其書是惟其人有雲輪困來覆斯窳

江陰縣學教諭王君墓誌銘

兆洛主講江陰教諭悔菴王先生爲監院先生之子文  
范孫傳霖皆從肄業以是得朝夕接警欬講論文藝叙  
述舊聞嘗爲先生序年譜致欽向之意先生歿文范請  
爲銘墓之文其可無言乎先生太倉王氏諱錫康字用  
菴晚而自號曰悔菴年二十五補弟子員屢試高等三  
十七始食餼四十九舉於鄉六十六而任江陰縣學教

諭八十二以老疾謝事歸以其年卒於里第道光七年十二月七日也系宋魏國文正公旦明洪武時由淮安遷太倉十數傳矣世世以文學顯曾祖秉忠歲貢生祖有暉太倉學生父起鵬廩膳生先生仲弟銑嘉慶

科舉人石埭縣教諭季弟鍾嘉慶戊午科舉人吳縣教諭諸子姓補弟子員踵相繼也先生承累世詩書之澤粹於氣敏於學達於世務爲文章研理必晰法度必嚴從之遊隨其才之所能而就之尤以砥行立品爲斷斷其在江陰學人士有問學者未嘗無誨其貧無資者不

責其贄且飲助之宮牆之內凡禮器樂器墀廡庭階藝  
植掃除之事無不胥飭縣令有公事如河閭渠編保甲  
藉力稽督必勤必慎不能刻方爲圓亦不爲崖岸以自  
表異故與之處者久而相忘去而如有所失也子文江  
文潞文泗文范文泗早歿文潞未弱冠而補弟子員蜚  
聲名公間年二十三卒傳霖其子也二歲而孤事母甚  
孝母病再刲肱以療而不使人知壘壘力學寢有成矣  
三十卒無子先生晚年耳目之用幾廢傳霖之歿也久  
始知之逾年而先生亦辭世矣文范廩膳生有文譽子

曰棠紹先生之業者庶其在此所著有知非集求是集  
蓉帆詩藁近義園課徒詩文草唱和集制義稿凡若干  
卷藏於家配高孺人先先生卒葬太倉州十三都過字  
圩新阡今某年月日文江文范奉先生之殯啟孺人之  
兆而合葬焉銘曰

先生之遇在通塞之間亦既有以成於身施於人紹其  
世而貽其子孫矣此古所謂有道君子無忝於師儒不  
愧於昔賢者也久而不湮貞此幽埏

雙流縣知縣毛君墓誌銘

君諱會掄字可元號遜齋毛氏自元至正間當州路推官祥始著籍武進七傳爲明禮科給事中憲祀鄉賢又傳爲福建侯官縣知縣協恭明亡闔門盡節

皇朝賜諡節愍祀忠義祠是爲君五世祖府學生馳贈文林郎揚烈祖也乾隆戊子科舉人贈文林郎西岩考也君生十一年而喪父卽能志學自樹事母楊孺人稱孝謹補武進縣學生乾隆戊申科中式江南鄉試副榜貢生甲寅將赴直隸鄉試道中策蹇而墜折左臂及足遂成痼家貧無以爲養庚申就職直隸州州判分發四

川辛酉署蒲江縣事乙丑佐臬司劉清幕丙寅委協理  
報銷局務總督勒保知其勤奏請儘先補用戊辰四月  
遭楊孺人憂以局務未竣奏留終事己巳四月始回籍  
營葬庚午服闋赴川辛未補忠州州判庚戌以拏獲鄰  
境盜犯保舉引見奉

旨發原省以知縣用丙子補雙流縣知縣戊寅調署青  
神縣己卯調署雲陽縣庚辰調署酆都縣辛巳十月奏  
調仁壽縣而君以左臂病劇乞休以歸歸則杜門課孫  
足跡不出庭戶歷八年卒道光八年九月某日也年六

十有五君貌肅而性和無疾言遽色而御史胥極嚴下車必首懲其奸黠者坐聽事書役竟日侍無敢跛倚交語決事明敏老吏斂手所泄釐積案無留牘多平反或情事乖左白其實於大吏常手自繕稿大吏以是推心任之縣有劇急輒檄君往事或格成例往往捐廉取辦青神縣有鴻化堰歲修築按民田科費奸民每匿田不科又蝕其贏堰益壞君清出所匿田二百五十餘頃量水大小爲歲修額堰民利之其調雲陽也以雲安鹽廠之訟廠故設大使所產鹽配附近十五州縣令商行銷

嘉慶十七年厥燬於教匪雲陽新寧開達四州縣商修復之因私其利而餘十一州縣之商改配他厥鹽久之鹽浮於引商竈交病遂訐訟君至請撤回十一州縣商之改配他厥者惟掣引時先四州縣其餘輪次以及訟乃解酈都之灘水勢險惡而多歧舟每迷渡因於灘間樹兩表相望題之曰指南轉柁皆捐廉爲之也以蜀民悍狠睚眦相讎殺刻全人矩獲一書所至授里中父老隨宜講解民多革心者自需次補官洊歷署授在蜀中三十年所無乏事去常見思旣歸猶手錄汪輝祖學治



臆說諸書彙爲一編曰治說彙纂又悔其治官時用刑  
或過當遺書誠其子注尚書呂刑篇反復古人明慎矜  
恤之意焉所著詩文集六卷官書二卷自序年譜一卷  
襍言數卷藏於家配呂孺人早卒繼配卽孺人女弟子  
二人書城湖南益陽縣縣丞文曦早卒孫一人書城嘗  
從予遊以某年月日將葬持狀請銘銘曰

毋小千室咸戴一天能愛能惡茲惟仁人厥心所孚損  
益是權博不在施高不在官朝采有耀夜室無遷

刑部員外郎楊君墓誌銘

君諱景仁字育之號靜巖晚更曰靜閑系出宋尚書左丞葉石林先生二十三世德賢育於青浦楊氏從其姓國朝康熙初自青浦遷常熟縣之恬莊占籍焉曾祖廷鏞贈奉直大夫祖繼祖國子生

旌表孝義贈奉政大夫考岱布政司理問銜

旌表孝子贈如君官妣陶贈恭人生母尹累封太恭人君負異質讀書過目成誦年十七補諸生旋以高等食餼自是試輒冠儕偶而鄉試屢誦入都肄業國子監不一載名流都下嘉慶戊午中式順天榜舉人以川楚例

授內閣中書庚申派本衙門撰文辛酉管稽察房兼掌  
誥勅房又充會典館協修方畧館分校

實錄館分校壬戌派協辦侍讀癸亥十二月聞理問公  
疾乞假兼程歸而已不及視含殮哀毀逾禮丁卯服闋  
補官戊辰派稽察中書科庚午補文淵閣檢閱辛未秩  
滿引見奉

古記名內用派理軍機清檔復充會典館分校

實錄紅綾本覆校甲戌擢刑部四川司主事派本司主  
稿兼辦浙江秋審已卯派總辦秋審處道光壬午擢刑

部安徽司員外郎仍兼辦四川司事充順天鄉試外簾  
官癸未奏擢郎中擬陪以尹太恭人年高假歸遂引病  
里居躬娛侍養時時近遊避囂以誘進後學爲務丁亥  
主講廬州府廬陽書院戊子主講太平縣仙源書院將  
歸而屬疾七月十四日舟次涇縣遽屬續焉年六十有  
一君祖考並以孝行旌門世澤純篤理問公尤敦厚本  
支置義田以贍之設義塾以教之又捐田千畝爲子孫  
讀書膏火君能善繼其志呈當事咨部立案隱然與范  
氏義莊埒理問公疾禱於神請開設敬節會以延親年

越日而病良已六週

單恩再以本身封誥馳贈世父及從祖陶太恭人不逮  
祿養勤念舅氏爲擇舊族嫁其弱女戚友媼黨有緩急  
未嘗不竭力營護也身之所居必盡其所當爲者爲諸  
生時所從問業必於名師宗經咨史精義致用遊成均  
時公卿多見器重遇

朝廷大典禮恭進詩冊每邀

睿賞居中書凡所擬撰矜重不苟典贍華貴後進式焉  
校閱館閣勤慎周詳寒暑無間雖苦煩未嘗諉誣居刑

部每辦秋審手錄本案前後檢校求其可以生者簽商  
駁正務得其平遇發審事件必務全株累尤體恤狴犴  
稽飲食察五木無不周以其暇探古今治獄事成式敬  
編五卷里居時值水潦與同志悉意拯濟又探古今救  
荒善政名言之可爲法者成籌濟編三十二卷皆按切  
時務實可見之施行訓子姓依於忠恕誠敬可世世師  
也蓋祥和之氣襲於君家世德相承君能引之弗替以  
是居官能敬其事在中書則中書倚賴在館閣則館閣  
藉手在刑部則刑部委重推是以及天下其爲

國家所倚毗抑可知也而惜乎未竟其施也然君之歸也徒以色養色養未竟委化先之此又天倫之缺陷而君所不能無憾者昔旌孝子今美順孫是所助於諸子矣夫配陶恭人克媿君德生丈夫子四人希錫國子生嘉慶丙子順天鄉試挑取臚錄希銓丁卯順天榜舉人辛未進士由編修擢御史外補四川潼川府知府希銓國子生希鏞道光辛巳

恩科順天榜舉人揀選知縣女子二人壻國子生趙錫麒邑貢生王履旋孫十人以道光九年十月十九日

墓常熟縣西鄉太平橋新阡兆洛辱與希銓同館稔君  
之言行謹勒實以銘君幽銘曰

孝惟天經本立道生修乎里巷施於

朝廷濟不期博因心則宏爾類攸錫視此繼繩翳此體  
魄羨門永扁有不遷者何谷何陵

翰林院庶吉士孫君墓誌銘

君諱原湘字子瀟又字長真孫氏宋忠烈天祐裔也高  
祖世柱候選州同知自休寧雲溪遷家常熟後縣析爲  
昭文遂爲昭文人會祖岐福祖永挺考錦本生考鏞



誥授朝議大夫山西潞安府知府曾祖祖皆贈如其官  
妣皆贈封恭人君生而穎異方三四歲卽知讀詩口誦  
指畫若能通曉蓋天賦也成童後嘗從朝議君於官朝  
議自奉天治中擢潞安府君所歷若山海關醫巫閭瀋  
陽繡嶺木葉嶺諸勝及黃河太行王屋名山大川風物  
奇險皆以詞詠發之年才弱冠而名滿都下矣中式乾  
隆乙卯

恩科江南鄉試嘉慶乙丑進士改翰林院庶吉士充武  
英殿協修官假歸得怔忡疾遂不出歷主毓文紫琅書

東游文諸講席教誨不怠多所成就士論翕然歸之凡  
邑中有水旱振恤之事君必先爲經畫故全活者甚衆  
初李廷敬味莊備兵蕪松主一時詩文壇坵吾友若李  
鹿耕丁道久陸邴生諸君皆往來吳淞煙水之間歲無  
虛日一日歸會聚之頃爲余言昭文孫子瀟者今之詩  
人也輒誦其詩數章脩閑澹遠有古人之風余雖不善  
爲詩而知好之頗以不獲見君爲恨及嘉慶十年與君  
同舉於禮部相聚都下因以潛觀君之容貌舉止脫然  
不與世俗爲類而蘊藉之氣溢於眉宇間蓋信乎深於

詩教者也然君學足以治行教足以澤遠才足以幹事  
乃甫登第而旋退僅以詩稱也可不惜哉可不惜哉其  
論詩之旨以爲一人有一人之性情無性情不可言詩  
無風韻不可言詩若徒以格律體裁規模唐宋者則失  
已之本來面目而真性情亡矣有真情性然後涵泳於  
經史百家以爲立言根柢自然獨闢町畦足爲一代正  
聲自古大家名家何嘗不以學力勝要之必從性情中  
來也此言出而專主性情以爲詩可無學而能者足關  
其喙矣以道光九年二月二日卒年七十君所爲詩已

刻者三十卷續集及古文駢體三十二卷未刻考

贈文林郎妣陳氏封太孺人配席氏封孺人子三人文  
杓縣學生文樾國子生文楷女二國子生吳來復縣學  
生邵淵懿其壻也孫五人文杓等將以某年某月某日  
塋君於某鄉某原先期請銘銘曰

嗚呼古之學者爲己今之學者爲人爲人者祿諸外爲  
己者淑諸身君之不汲汲於仕進而以昌其詩也意在  
斯乎則此巋然者東野闔仙之侶方有經過下馬捫碑  
酌酒於茲者矣

趙君孟符墓誌銘

既北先生之文孫曰孟符以敦行力學發聞交遊間道光九年十一月二十日捐館京邸兆洛於君未獲奉手而與君弟芸西友善往慰之兼問致疾狀芸西曰吾兄迫家累一意進取既中副榜藉客授試都下屢不售益發憤今年主講涿州鳴澤書院院久空席吾兄懇懇程課來學者無問才否隨所造與誘進生徒親之若父兄嘗有咯血疾發而劇生徒釀金具葺館疾漸亟共與致之京師就醫藥其歿也咸來會奠無不哭失聲者侍疾

者自京邸歸述病革而囁猶喃喃爲生徒課文字也言之嗚咽不能成聲洪君麟孫之誅君也以爲君素豪雋論議慷慨比歲彌自歛抑有所稱說依於和平人以爲所造益粹而不知其牢愁內煎菁華漸竭也君尊人海珊先生已衰老恃二君競爽博尺寸進以踵前武而孰知君竟止此耶故芸酉九摧痛不能自堪嗟乎託清華之曹負卓犖之資與之以困心衡慮之境以淬其志智天於斯人不可謂無意者而卒中道隕之彼酣豢逸樂唾手青紫坐享壽考者其真別有一天在耶君諱慶齡

字孟符生乾隆壬子年七月初九日得年三十八配謝氏繼程氏先卒子二人曾儉會勤芸酉將以某年月日迎其柩歸塋橫林之祖塋豫請爲銘以待事銘曰

鶴肅肅而在林鴻噉噉而孤遊既銜利之有心又避患之無由羌宇宙兮蕭寥獨矢志而懷憂冀蒙榮於歲寒遭繁霜而夏凋閱琅琅之金聲埋皎皎之琳球諒此骨之不腐何夜臺之爲修

毛府君墓誌銘

府君諱 字景維又字錦微先世居吳之閩門明時諱

愛溪者始遷揚州江都縣之邵伯埭曾祖學祚祖繼琦  
皆以壽考賜粟帛爲壽官考克勤國子監生嗜學工書  
發聞鄉里馳贈奉政大夫妣趙妣封宜人府君幼而嗜  
學以攻苦致疾遂輟業焉然平居手一編未嘗暫輟喜  
讀前代諸史論列人品能抉目論之藩籬毛氏自遷邵  
伯六代同居至府君五世矣兄弟行十人府君爲家督  
敦睦克讓內外無間事從父如父字幼弟如子食則接  
席讀則同師埭濱運河南販所湊知詩書者少府君嚴  
師遜友砥之於學以身勤之以子弟先之數年之間並



誦斐然科第繼踵府君教也子夢蘭以進士選湖南知縣歷沅江武陵湘鄉邵陽湘潭府君常就養所至鍵一室課子孫襁褓粗糲不使蹈遊閒之習不使飲食讌會雖誕辰不張筵而軫念岸獄時時飭巡視潔井堰時其飲食量其寒暑至節縮衣食以恤之在武陵時會山水暴至潰隄障且乘城鬪民人飄溺者無算府君令署中春黍作餅餒命救撈諸舟皆具釜鬻儲藥餌有所救輒隨宜治雖異災民賴以安夢蘭以湘潭客民互鬥案挂誤遣戍數縣士民爲劇貲請府君持不可曰譴戍亦

天恩也有罪不譴是誣上也襍被蕭條提攜眷口以歸  
處之晏然府君足跡未嘗至公府道光四年冬高堰涸  
潰球當其冲勢岌岌府君時已病乘小舟冒風浪力請  
於郡守邑宰出泉募夫協力堵築一鄉以全府君自處  
以義接人以恕卽奮發赴事不避嫌怨一以和平出之  
常曰造物勞我以生先民有言能勤有繼但時時淬厲  
精神則經濟事業皆從此出故自少至老無一息不矻  
矻自厲晚愈貧幾無立錫而戒子弟惟以培植學行不  
墮身名爲訓焉生於某年月日卒於某年月日年六十

有七

誥封奉直大夫邵陽縣知縣以某年月日塋某原配徐氏

誥封宜人子五人夢蘭嘉慶甲子科江南鄉試舉人巳巳

恩科進士分發湖南歷任沅江武陵湘鄉邵陽湘潭事  
庚午科湖南鄉試同考官夢齡太學生夢文候選從九  
品夢弼廩貢生國子監肄業期滿以訓導用署邵州訓  
導灑嘉慶壬午科直隸鄉試舉人考授國子監學正孫

五人均斐然向學克紹世業夢蘭與兆洛同舉於鄉相  
親善從容敘述府君之所以教與所以施於人者私心  
竊向往焉而未及一拜床下府君之墓夢蘭奉行狀來  
請銘銘曰

瞻君子斐民懿蹈規矩躬自治遜五品先門幃於鄉邦  
裕乃施樂與約惟安之而怡怡而師師積休嘉孫子胎  
千萬年貞斯詞

東湖縣知縣蕭君墓誌誌

道光九年十二月湖北東湖縣知縣蕭君卒於其子以

霖任所明年秋其仲子以需匍匐乞余爲銘幽之文夫  
君之歷官所在或四三年或五六年皆有績可紀而於  
江陰則十年其可紀者修復書院爲最力焉蓋書院自  
乾隆三十年增拓以來又六十年室宇隳敗生徒零替  
幾不可問矣君鳩合士人作而新之易其朽蝨聖其污  
漫齋舍庖湍旣有次第而縣有新漲大陰草陰沙田三  
千餘畝洲民攘奪爭訟無已君卽履畝丈量簿錄以爲  
生徒膏火之資而訟亦以息於是課有所贍居有所處  
延名師爲之講授至於今而文學彬彬浸盛矣其事親

至孝母吳太宜人一語一言中心奉之無違太宜人九十七而終君年亦七十矣猶若孺子慕者余生所僅見也君諱瑾字芝三號梧軒浙江山陰人祖再興父芳雅芳雅府君卽世君方在髫髻家徒壁立吳太宜人拮据教養至於成人太宜人行動皆有法度子弟嬉戲不得輒出中門鄙倍之語不以聞於耳非僅不得出諸口也稍長屢試不售太宜人命給事吏部久之得議叙正八品揀發江南河工補應縣管河縣丞升宿遷縣知縣緣事落職留防要工逾年捐復原官署高郵知州補荆溪

知縣調江陰大計卓異丁吳太宜人憂服除選東湖縣  
莅官三年以霖迎君就養抵山東而沒計君入官三十  
餘年以霖迎養前未嘗一日休息性和平愷易處事詳  
審凡河防水利災旱刑獄賦稅關民生利弊大政所治  
必舉要尤好急人之急士論稱之卒年七十八祖父皆  
贈奉政大夫祖妣夏氏贈宜人妣吳氏

誥封太宜人配吳氏繼配潘氏皆封宜人子三以霖山  
東曹州府糧河通判以霖山東候補鹽場大使以霖廣  
東候補鹽知事女二皆適士族孫十一人曾孫二人今

以霖等將以道光十年某月日葬君於山陰縣某鄉某  
原銘曰

猗歟蕭君秉政有經孝以出治覃於士林無有遠邇漸  
民之深陳諸太史是爲令程岵岵稽山其高幾里東並  
禹陵西到江渚中有幽原惟君之墓我銘其窆庶幾永  
譽

養一齋文集卷第十二



養一齋文集卷第十三

武進李兆洛

墓誌銘

江西巡撫吳公墓誌銘

公諱光悅原名廷燮殿試時有同姓名者

純皇帝親更焉字星一號見樓會祖爾常始由欽遷常州陽湖縣居邑城東北內祖延昭父題鴈仍世隱德皆以公貴贈榮祿大夫妣皆封夫人少食貧砥志勵學早擅文譽乾隆甲寅舉順天鄉試嘉慶元年丙辰成進士

官內閣中書己未入直軍機房壬戌川陝軍功告成叙  
勞遷吏部主事癸亥補文選司主事甲子京察一等遷  
文選司員外郎公幹力強正辨於古今政治得失之本  
而得其遷變閉塞旋轉之機當代憲典時世情狀又悉  
綜練所擬批答諭旨恒稱

上意機廷委重時時從重臣讞獄瀋陽湖北山東沉心  
端度慎察本末與輕重比無有枉撓恬和無鋒鏑而日  
迴霜肅莫干以私乙丑保送御史戊辰補浙江道監察  
御史己巳巡視中城庚午轉廣東道御史壬申調掌京

畿道公內直久外省大吏陳奏利病異狀風俗異宜  
刑法異尚既盡知之故在諫院所建白務權劑緩急求  
其切於施行者疏多畱中未嘗剔一事擊一人以自爲  
名癸酉以京察選授寧國府知府是時兩江總督百齡  
前爲湖廣總督公讞獄時所鐫級者也銜前事以承審  
部控案有所平反深文持之以不實劾奏褫公職甲戌  
援例開復乙亥選福建寧府以親老告近改浙江處  
州府旋署杭嘉興等府所至治辦道光元年辛巳丁太  
夫人憂癸未服闋補直隸保定府畿輔郡館轂天下劇

勤稱最公張綱挈目不勞而理甲申授河南河北道分  
守漳衛懷三府兼管黃河北岸黃沁衛糧祥河下北曹  
考五廳堤埽工程儲芟相榷屬役賦丈身駐工所晝夜  
巡視所督上下三省交汎五百餘里里有分廵立簿帳  
總之汎弁勤惰兵役聚散水勢漲涸堤形安危晷刻畢  
驟以相檢稽瞭若示掌莫遁銖黍河帥下其法以爲各  
道式乙酉升湖南按察使丁亥升湖北布政使甫三月  
奉

召授都察院左副都御史蓋有間之者言其老憊故也

既

廷見奏對壯敏

上意益嚮用之己丑正月簡放江西巡撫江西毘連閩  
粵贛州南安尤錯山谿險民囂悍時煽聚攻剽病商旅  
或掠人口質以求贖劫殺之獄日上公至則請慎擇長  
吏寬其考成措置經費以裕其用明賞罰以作吏氣而  
重購募以絕匪從量撫綏以開其悔悟且請照廣東福  
建刼質加等之例犯從重比以杜其萌

上皆從之由是量能授任幹吏爭奮士無匿奸民知向

方時

朝議鹽法曰刻弊由奸私當減官價以蔽之緝私梟以杜之公奏曰官鹽有價有課有費私梟止有價而已卽多減勢不敵緝梟急懼轉而爲盜鹽之於民猶布帛菽粟茶烟竹木也聽其買賣任其流通關津征稅遠近利賴若設官征課于場竈民運販者旣出課稅卽任其取之則私梟皆良商國課裕而民食便

上然其言下其議直省督撫議竟格辛卯五月積雨大潦郡邑多罹其災公既請發帑以賑又捐俸貶食勸分

以濟之輪滯聚平市糶所以綏輯之者無不由至奏截  
留漕米八萬石以裕民食民以忘其災而公遂積勞邁  
疾以十二月十三日薨於位年七十有三公面豐皙少  
鬚髯言語蘊藉雖抗論時務有所糾正未嘗疾言厲色  
恬素無嗜好粗衣惡食窮達同趣行已修潔絕去依傍  
而未嘗以矯介鳴節計平生服官在軍機諫院稍久敷  
歷於外所至無三年淹而因民量地導宜去泰咸著成  
績施于家惟孝惟友事太夫人終身色養數日曠定省  
輒皇皇如有求有弟負文望早逝恤其廢以子嗣之室

如一焉配陸氏繼配張氏皆前卒皆贈夫人再繼配楊氏子四履仁候選鹽庫大使早卒文嘉四川候補通判署叙州馬邊同知觀出爲叔父後咸監生孫八人兆洛少時辱文字交又與公弟同筆硯比居京師公方直樞廷不獲朝夕其後子客授揚州而公適主安定書院時從容從遊每宴語而退私心充然謂天下事有任之者而愧不能知公之深也文嘉將以某年月日葬公於某鄉某原來請銘其何可辭銘曰

皇司亮天懋翼鄰哉寅盡勤宣庶明焉資磊磊猗公始



終不嘗器以道冒方圓具宜叩救庸痺臣堪匪辭內勳  
密勿外綏睽攜惇直周行未爲無施施所未竟噫畫我  
思存無藏力歿無遺貲不激不隨式察臬師揭揭綱練  
洋洋表旗我辭質幽陵谷貞之

明經蔣先生墓誌銘

先生姓蔣氏諱鎮藩字我金晚自號曰適航於友爲益  
友于師爲良師于鄉里爲德望于文學爲碩儒德不自  
潤道不自襮名不登仕籍年不副仁明以道光十二年  
三月五日卒于里第年六十一平居藉授徒精給事畜

益無宿儲晏如也事親必具甘旨能以色養未嘗一日  
遠離兄春江挾筆硯客諸侯稍積其資置薄產先生益  
不問生計家事一聽于兄怡怡無間言教弟子嚴而溫  
以其身爲規矩以其性情爲薰蒸以劑其剛柔而變化  
其氣質遊其門者率成端粹士所與交邑祝聘君子常  
汪廣文海門夏廣文秋薌劉明經鷺峯最善相砥以義  
華皓彌固予少壯時往來江陰與君及諸君遊志相合  
年相差促膝語昕夕不厭及主講於此私心亦樂其  
與諸君子時過從也乃未幾而予常卒又數年鷺峯亦

卒至今又失適航焉白首之交凋謝遂盡兩廣文又越  
在江左風雨之朝思一握手褰裳命駕將安適哉先生  
著古近體詩若干卷子嘗題其端方圖梓而傳焉嗚呼  
先生之可傳詎盡於此子志登將以其年二月十五日  
葬先生于邑東之丁家原敬銘而傳諸幽銘曰

操之介兮氣之邁兮就而不入兮守而不柴兮存存萌  
萌沒齒無懈兮斯人逝兮吾安賴兮原兮岡兮後世其  
拜兮

江陰縣學貢生葉君墓誌銘

先生諱廷甲字保堂雲樵其自號也葉之先自南陽其  
後湖州太守叔宏始居烏程當唐開元時至後梁龍德  
中壽昌教諭貢元再徙壽昌新亭坂又析居常樂村明  
萬歷時有靈萃者客江陰之陽舍鎮遂占籍焉五傳至  
先生之考贈奉直大夫鳳岡仍世爲方雅族先生寬易  
肫實不慕外榮孜孜務學閱尋理奧確志程朱之學力  
行而孱守之歆然不出於口語詞章閒而與子言孝與  
弟言弟媿媿如不足也又多識郡邑故事嘉言懿行正  
襟而談窮日夕不厭嗜藏書構水心齋以皮之凡五萬

卷暇卽兀兀披閱發幽闡潛如恐不及邑楊文定公爲  
當代名臣遺稿未流布先生訪諸其裔得而刊之王梧  
溪元季故老詩稱詩史傳稿散佚先生徧借遺本次第  
彙集精校而梓行焉他如徐霞客遊記繆思亭東林同  
難錄皆版本腐敗剋弊購而爲之修輯遂成完書少從  
郡中夢暘鄭先生遊得聞味道研經之要餘姚抱經盧  
先生主講龍城書院復親炙焉故于常州諸宿士如蘇  
景程孫述甫楊隨安丁若士臧在東張翰風皆敦縞紵  
歡數往來蘇杭間其魁碩士無不奉手願交所至必稽

求古賢於名人祠墓雖迂道無不瞻謁也處鄉里柔而不可犯篤任卹里有利益事或邑中有所修舉必殫心力爲之倡市集劇擄捕因爲奸藪先生力勸戒聞諸令爲之條約俗以大革先生歿猶遵守焉喜爲山水遊老乃彌健七十五歲遊黃山徧歷巖壑名勝腰腳如少壯人閱二歲復遊洞庭拜東園公祠訪林屋洞天至包山摩挲唐經幢歷石公山夕光洞泛明月消暑諸灣而返又聞四明范氏天一閣藏書甲天下遂逾錢塘涉曹娥探其所儲畱者閱月乃謁虞帝廟探禹穴還經山陰求

修禊亭故址所至皆以詩記之道光壬辰三月十九日  
卒于里第年七十有九所著歷代世系圖歷代年表天  
文輯略古今學校考文廟從祀考三代以下人物考名  
臣謚法考古今錢譜輿圖指掌天下沿海形勢考嚴江  
水道考楊舍堡城志九華山志考古今書畫錄古今同  
姓名錄輯補詞科錄知今錄葉氏得姓考葉氏進士錄  
訓子書黃山記游編太湖游記保堂詩鈔水心齋劄記  
皆藏于家先生娶於張淑慎其儀穆嬾休德側室陸肅  
承樛本克成幕廟之祥張後先生一年卒陸先卒子三

玉田早歿張出朝慶候選直隸州同知天慶候選布政使司理問陸出女一張出適同邑候選通判趙錫仁孫二長齡長華孫女一甲午十月初三日朝慶等奉先生及張安人之柩合葬於松墩涇之原陸安人祔焉先期來請銘予不餘歲時因若士識先生卽兄事之比來暨陽主講席歲必一再見于先生之立身行已頗能知其畧其可以無言乎遂爲銘曰

慙慙君子獨修其身溫篤自將靡有疎親德不爲祿善足以薰晚而逍遙游乎天鈞詔幽有炯貞珉不磷



孫君仿山墓誌銘

仿山名讓字于丕姓孫氏先世系樂安勰宋元祐三年  
進士勰五世孫諭官司諫居金壇明季司諫裔智長自  
金壇徙常州戚墅堰

國朝雍正二年分武進爲陽湖今爲陽湖人也曾祖唐  
臣祖朝佑仍世清素考璟字虹如國子監生贈奉直大  
夫妣楊氏封太宜人配吳氏贈公躬行君子以信謹著  
鄉里子三人君其長開敏好學制舉藝冠儕輩贈公挈  
之游京師肄業國子監乾隆丙午科中式順天鄉試至

壬戌始成進士又以歸班候選常客授以給事畜庚午  
贈公棄養癸酉選授山西臨縣知縣以母老告請近省  
選安徽懷遠縣知縣時教匪林清蠢動豫中巡撫胡公  
克家以兵駐亳州防侵軼君至卽委以糧餉事是歲十  
月爲楊太宜人七十壽辰君故豫迎其家命吳孺人侍  
太宜人至懷遠旣至而君不得赴任所遂暫寓於鳳陽  
明年正月吳孺人遽沒於旅邸至四月撤防乃泣懷遠  
任焉邑濱淮西迫濠梁諸山淮流出兩山間狹不得暢  
多水患舊有十二門塘堤其外而引淮入之爲漑灌利

歲久廢圯君往來相視啟大府脩復之民以饒益淮之  
澤曰上洪水湍悍爲涉者病君造舡募擢郎爲義渡行  
旅稱便文廟卑隘倡捐拓之制度具備邑志久不修延  
邑賢士大夫採摭文獻褒輯節義以示風勵又招所知  
佐鈎稽載籍躬計正之二年乃成稱佳志焉墨吏議去  
官逾年事乃得白仍候補安徽署鳳陽府同知道光甲  
申丁太宜人憂服闋發山西候補歷署繁峙太平縣事  
庚寅始遷補臨縣原缺年餘復墨吏議休致貧不能歸  
賴同官飲之以行其親家張宛鄰琦方爲館陶合招之

君時已病乳岩困甚宛鄰故精于醫既至而視之知其不起留諸署進參餌而陰爲之治水焉竟以辛卯十二月三十日捐館於館陶縣治年六十有八君厚重誠樸不見喜愠擇交必嚴既與交則順美匡失無不盡治官以通民隱爲務而實力行之不鉤鈇細碎博浮譽貌既惻愍口又訥訥不能道寒暄然見義勇爲較然不欺其志久與處真純之氣相忘物表其罣誤也但善於詞令亦可以免而君不屑也待二弟肫摯無間有所需不待告已爲之具處困窘中嘗先籌弟之歲用資給無乏而

後自爲謀諸從子皆以成立制舉業自明化治以來體  
格遷變文詞高下能洞悉其所以然而治而裁之古不  
乖時今不同俗歸諸雅馴一時莫及也吳孺人生丈夫  
子五勛勵劬勩海青孺人歿於鳳陽海青塲又數年勛  
歿於宜興又數年勛以候選吏目歿於京邸勛實將其  
喪以歸逾年亦歿於宜興君歿時存者惟劬卽宛鄰女  
夫也孫三人曾愈勛出曾開勛出曾頤勵出兆洛昔侍  
贈公虹如先生言必依孝弟視之恂恂鄙人也而鄉黨  
稱長者必歸焉君實克肖其德乃所至坎壈一官濩落

屢戾于上游又屢喪其良子相見雖未嘗作戚戚容然其懷抱抑可知也已嘗驗諸人羣凡性情寬和者處境多暇豫若彼蒼黔有以相之者而於君獨不然順受其正君何尤焉保先世之澤而貽諸子孫斯亦可矣劫將以某年月日葬君於某原來請銘銘曰

蕩蕩者天地胡坎珂躋躋而趨如迷陽何世不可喫也質不可化也其推其尼莫之爲也金之玉之而有斯磨也永翳形於一坏惟昭質其未虧靡風兮荔雨若有人

兮山阿

微明孔君墓誌銘

君諱昭孔字微明亦曰味茗江陰華墅鎮人系尼山七十一世其四十二世檜自魯遷浙五十一世屋宋紹興中官江陰因家焉仍世清素考諱廣居能詩文通許氏說文解字學著說文疑疑十卷工刻石傭其藝以自給贖者爭客之浙東西藝苑家稱瑤山先生者也君少以貧故不能從師從伯兄治農圃甚勤敏瑤山先生器之令輟耕而從遊課以許氏說文隨講解輒貫串夜分伺父寢篝燈誦五經四子書乃旁及子史百家皆能通其

大意以是繼父業稱重諸公間其爲人廉而毅不苟取  
一介遇義所當與度力所及無不與時時傾其囊與之  
居溫然無隅默導人以善久彌見思樂道鄉里節義善  
行時爲之記述曰吾不能文徒以朴拙出之期不失事  
實而已所爲傳記諸文意皆如此以備於碑帖刻作故  
多居武林暇卽窮搜南北峯巖谷之勝皆遊跡所不至  
或流連竟日人莫測也所遊雖險遠必至辛卯五月偕  
友遊雲棲覺足疲遂畱宿歎曰精力頓至此耶意不自  
得頃之柳生其左胛竟不治以七月十一日捐館於武



林寓舍年六十有三子少時曾謁瑤山先生於其居摩  
挈所謂瑤山者因乞得先生篆書楹帖道光三年來主  
暨陽講席始與君契屋歲必一再見予與君及劉鷲峯  
衡同己丑生交相善也戊子歲邀二君飲輩學齋甚歡  
且日閱十年當更舉是觴知誰健者越明年而鷲峯奄  
逝今君又繼之人生幾何行自念矣君娶于鄒生二子  
一女而鰥君年才三十六不再娶長子憲三次殤女適  
士族憲三常相從刻字簡雅如父祖亦能不戚戚于貧  
賤者君所著說文疑疑又夏小正考正一卷皆已刻古

文隨手條記數卷憲三方屬予整次而傳之以道光十三年二月朔日葬君於所居北砂山之北麓銘曰

通其所通非世所謂通也而能忘其窮吾遍交其三世矣而其行其能其遇無不同者曲肱疏水固吾夫子之家風也其視世慕浮雲太空不遷者存奚始奚終

湖南巡撫左公墓誌銘

公諱輔字仲甫一字荷友號杏莊世爲常州府武進縣人雍正三年析武進爲陽湖今爲陽湖人也曾祖德昌貢生祖宜康熙癸巳

恩科武舉人浙江杭州府督運千總署處州守備考鎮  
國子監生三世俱以公貴贈資政大夫妣皆贈夫人公  
幼而貧苦力學以躬行爲本爲文章必自道所得中乾  
隆癸卯科江南榜癸丑始成進士以知縣用籤發安徽  
補南陵縣知縣旋署巢縣調霍邱以任南陵時錢糧未  
完五分以上革職巡撫朱文正公珪以業經全完咨部  
請免離任而部議已下奉

旨引見旣引見仍發安徽以知縣用尋補合肥縣時  
廷寄問安徽省各官政績巡撫荆公道乾奏左輔實心

撫字寬嚴並濟輿情愛戴

上俞之而吏部以合肥之補不合例駁斥巡撫又專摺力請奉

旨左輔聲名原好朕所素知着如所請行越四年巡撫王公汝璧以命案取巧規避特參革職後撫譴前案無規避情事請開復部駁不准逾年巡撫初公彭齡至以人材可惜特疏請加錄用奉

旨左輔在安徽州縣中循名素著能得民心著加恩准其送部引見既引見仍發安徽以知縣用再署合肥縣

尋補懷寧縣越一年奏升泗州直隸州知州而公五十八矣在泗三年調署寧國府知府奏署潁州府逾年奉旨升授潁州府謝恩

召見養心殿問保薦何人以文正對

上曰爾是朕素日知道的人因惶恐謝

上曰好爲之逾年拜廣東雷瓊兵備道之

命明年奉

旨補授浙江按察使

陛見請訓

上曰朕知汝做官好故擢汝爲臬司勉爲之明年奉

旨補授湖南布政

今皇上登極補授湖南巡撫道光元年入覲

上曰爾是

先皇帝識拔之人歷來辦事公正巡撫大要在用人不  
避嫌怨實心爲民才不負委任耳三年二月奉

上諭左輔年逾七十精力漸衰着來京聽候簡用五月  
召見勤政殿奉

旨左輔年力已衰着以原品休致復

面論軍機大臣曰左輔精神尙去得然已七十三歲未  
可久恃現在京堂侍郎皆無缺若合候補轉受羈累不  
如聽其歸去蓋

上之恩意惓惓如此公歸囊中不名一錢舊屋已不可  
居別構第于邑中賴知交當道者更迭延主書院講席  
誘進後學壘壘無倦宅旁有隙地結小圃蒔花木歲時  
集親故賦詩交懽從容起居者十年道光十三年八月  
二十五日薨於里第年八十三公少更坎坷多練世務  
審已量物必求其宜而勁持一節不詭俗自挫故爲親

民官能究悉土俗疾苦出死力拯救在巢則禁溺女勘  
山田在南陵則頒塾學條規在霍邱則習壯丁禁帶刀  
鋤大熟在合肥則修縣志爭彌補章程在懷寧則移丞  
署修申明亭在泗州則設局教民紡織請豁民欠力爭  
開睢河利害爭孫國柱叛案至於編保甲崇學校葺名  
賢名宦祠宇則所至皆然雖在官不過旬月而所設施  
常若已歷數考故所去則人民攀送或羣衆赴省請留  
去則思之不置數十年如旦暮及爲監司不苛細務勤  
遠慮銷亂萌在瓊州則撫崖州黎以靖奸宄爭開採昌



儋石緣以安黎人請豁儋州鹽課屯糧民欠以清官逋  
在浙則檄擒海濱無賴以安閭閻瘞南北山寄場棺木  
以消滲氣在湖南則清屯界設農官慎義學詰漢奸精  
練勇修礪卡簡苗役以綏苗民立辰沅靖三府巡守河  
道章程以安行旅疏奏具在炳炳不忝古名臣公起蹶  
縣令垂三十年雖治民獲上屢列薦剡而挫折逾甚落  
落自守不以爲憂喜旣任方面不六年遂膺峻擢至巡  
撫其所以膺特達之知者乃盡在盤桓邑令時蓋

聖主重親民之官又眷念舊臣信其舉主推心不疑至

垂念耄老全其終始榮遇超越今古罕觀而公勵節慎身不負所學以仰承

恩意者亦足以爲爲臣者法矣所著有念宛齋詩詞古文善牘官書五種已行世配陸繼配徐皆封夫人側室丁例贈孺人子男七人晟昂陸出晨智徐出易曜昭丁出晟先公卒昂蔭生候補光祿寺署正晨候選鹽運司經歷智監生易浙江候補批驗所大使出嗣從叔大任曜監生昭廩生孫六人公里居時於兆洛爲文人行而不常見及兆洛出宰鳳臺而公方爲首邑相見以同官

禮且誇其爲政於人甚暱也比公致政歸兆洛亦蜷伏  
閭巷歲時必相見獲聞治官諸績公自述生平所閱依  
年而譜之斷手於告歸之年今道光十四年十月二十  
八日昂等將葬公於新阡奉公所爲年譜又續告歸後  
之十年示予請爲銘不敢辭銘曰

天畏自民敬哉有土聖所叙欽恭生是與公之勤民適  
俗秉經因利而導鑒祥而刑維民之勤而宦之拙什伯  
其最一再其黜

皇有信臣載雪載培抗章言之

帝曰俞哉爰遷其秩爰總方任解嬈滌苛靡有氛祲始  
何冲冲繼何隆隆循之雍雍卽之冲冲匪奇于數匪奇  
於遇守以惇篤忱恂惟素忱恂維素大哉

皇言惟曰好官惟曰得民不盡其力懼其衰至俾克永  
譽以全恩意

帝昇之閒

帝與之延從容堯天蓋十閱年令始令終何虧何跛

聖主之宏蓋臣之致蒿里悠悠貞之堅珉耆言允滿底  
其後人

貴溪縣知縣陸君墓誌銘

陸出古陸終氏漢晉間爲吳中望唐宰相忠宣公至君  
凡三十二世明初有昭毅將軍都督同知世襲錦衣衛  
指揮使諱福者自淮安徙居常州君之十四世祖也會  
祖廷焯祖載起並諸生贈順昌縣知縣父廣霖乾隆己  
未進士歷官福建廣西終恭城縣知縣署思恩府百色  
同知治績載閩志嫡母高繼母莊生母林君諱繼輅字  
祁孫一字修平恭城之暮子也九歲而孤林太宜人實  
能長而成之君儀幹秀削讀書夙成文彩四照音聲清

如嗷鶴吐辭雋婉常傾座人當代先達有人倫鑒者爭  
羅而禮焉不肯輕涉世事惟肆力于詩清温多風如其  
人也嘉慶庚申中江南鄉榜八試禮部仍黜丁丑大挑  
二等選合肥縣學訓導君少羸善病憚鞅掌而爲校官  
得士譽上游薦以才任治劇又修省志董成事以勞議  
叙授江西貴溪縣知縣到官三年治政清肅因疾乞休  
既得請旅省城行有日矣而竟不起子年二十始識君  
于君之第一時里中少雋士皆集因而定交子每至郡  
必詣君同人皆集君所子之友皆君友也君綢繆婉犖

篤切劓之誼每朋尊促坐清酒百壺歡笑間作已或觸  
所聞見微辭致規因極論得失欲刳心相示涕泗橫流  
不知者以爲酒狂也自予服官淮甸遂不復見比君赴  
合肥予適旋里得一再見而情緒非復昔時矣君盡室  
之官空其屋以賃某姓某不戒於火盡燔所居追憶昔  
所遊宴處如在目前念君歸來當何如措懷而竟與人  
俱渺也復可以致思乎哉君性至孝痛祿養不逮爲林  
太宜人請封典譔錄年譜求諸同人能文詞者爲序讚  
銘誄等若干篇都爲一集以傳於後日貞珉錄嘗致予

書欲有所爲予不能繼諸人後遲遲未成也今君亡矣  
愧負何可釋著之君誌成君志焉著崇百藥齋詩文集  
并札記五十餘卷學者多愛誦生乾隆三十七年壬辰  
十一月二十六日卒道光十四年甲午六月二十三日  
配錢宜人生子耀連蚤卒女三壻憚彙昌洪毅曾楊方  
訓皆友之子皆文而才造室王生子二曰光迨曰嘉遂  
光迨五齡嘉遂二齡耳方耀連之不祿也君以兄子耀  
適之子聰應爲嗣孫曾孫佑杞佑勤君歿耀適爲營葬  
于陽湖豐西鄉橫塘之阡道光十五年乙未十月二十



五日也耀通齒稍長于君恩則父子而相親若兄弟其  
趣操亦略同庶幾廣受籍咸之亞方刻君遺書而傳之  
銘曰

行何匆匆世何息息通而非通窮而非窮君文則工

候補兵馬司副指揮屈君墓誌銘

君諱軼字侃存亦字无佞姓屈氏三閩大夫裔也六世  
祖坦之鄉飲賓鼎革時殉國難祀鄉賢考文熊本生考  
敦禮皆國子監生君幼而嗜學二十四補弟子員食餼  
捐訓導攝南漕事勤訓課欲與邑人士收采菽文故事

成邑志未果又捐兵馬司副指揮未上趣操強毅治古  
文詞不詭俗爲稱譽刻意東漢西晉諸作者神理幽渺  
韓柳以下蔑如也爲鄉飲賓建專祠設祀田六十餘畝  
於祠後創三閭大夫祠請于官給春秋祭纂屈氏世譜  
網羅散佚發抒幽潛事覈義高方軌典訓天真豁暢不  
作家居凡建祠葺譜雖駁其族謀之而有不足輒取足  
於已又喜書籍置書盈二萬卷皆善本估者伺所欲得  
輒昂值亦不計以故世有產逾中人比其歿幾無餘者  
焉予未嘗識君君創三閭祠屬予碑之而以爲可遂以

文字相往來未幾君盲於目不能出門命其子問業相距遠屢欲過從輒輟而君竟歿矣生乾隆三十三年十二月二十五日卒道光十五年六月十九日配歸氏丈夫子一祖徐卽從予遊者女子子二五經博士言良愛縣學生陸正封其壻也祖徐將以某月日葬君於郭北菜園阿來請銘曰先子之命誌墓必託諸先生予之于君神相交矣其可無言銘曰

羌蹇蹇兮緼於俗而不可混兮內白任道真而致腆兮靈修之苗宜此瑚連兮潛兮潛兮日已遠兮窈窕然疑

而不我得見兮匪命之短分之淺兮寄此泉扃永繾綣  
兮

慶陽府知府薛君墓誌銘

兆洛年廿二始識畫水薛君於江陰已翹然見推士類  
以予友祝子常爲君婦弟遂納交旋登進士官中書予  
至京師君寓頗隘分室以處之後雖別寓而遊宴未嘗  
不同闕二年君外用得廬州同知予亦謁選得鳳臺知  
縣幸同省時相聞比予居憂主講懷遠君又命其子從  
予遊未幾予歸又數年而君亦歸君不肯出門一步予

凡三四過君君長於余十二年而意氣充然甚覺予之  
衰憊也相距七八十里苦不得朝夕見明年君年八十  
矣擬載春酒爲君壽因作十日留而君遽歸道山念四  
十餘年予兩人踪跡在疏密之間臭味在酸鹹之外方  
謂百年已分常常貢思亦差勝于長乖而竟止於斯也  
傷矣君容貌魁傑居人羣嶽若山時吐音如鐘發言具  
有風旨或濟以諧諱明儕會飲常傾倒一座多識朝宁  
故事能道其所以然者人有過弗翹也工爲隱語使人  
思而內慙直中書十一年爲同知十八年歷署太平廬

州安慶池州鳳陽諸府事而廬州則三至焉治事必敬以勤欽欽然常若日不暇給者臨事能斷多出人意表遷甘肅慶陽府知府未赴以病免家居養病十一年不問戶外事雖所暱戚友未嘗過從讀書字字索解信於心而後已有所疑必識之逢人輒問一書竟縷縷籤記者數百處書法做顏魯公風骨 家貧有乞書博糲

自活亦不多作詩古文詞端謹有法度而常自以爲不能有能名者必拊手請益曲謹如弟子精制舉業一時學者傳誦在京師時遠近爭執贊出門下者皆有所成

就發聞于時嗚呼以君之言論風采使得居侍從之班  
當出入諷議之地必能裨輔

主德匡濟時務庶幾張復之蘇子瞻之儔而倬直

內廷旅進旅退一麾參佐靡事不爲違才易務之悲君  
固不以屑意而於造物生材之意毋乃有所未盡歟君  
諱玉堂字又洲畫水其自號也原籍四川蒼溪縣姓淳  
氏高祖考諱宗智嗣于中表薛氏始冒薛姓曾祖考諱  
之佐順治八年四川舉人歷官戶工兩部郎中管理龍  
江關稅務升廬州府知府始遷於江寧祖諱景珪康熙

三十五年四川舉人歷浙江建德烏程河南光山知縣  
始遷無錫考諱稻孫乾隆二十五年江南舉人妣徐恭  
人君元配徐恭人繼祝恭人卽吾友子常之女兄先君  
卒子仲德卽從子遊者孫三人俱幼君卒于道光乙未  
八月二日距生于乾隆丁丑得年七十九仲德以明年  
三月二十六日葬君于 鄉 原銘曰

礪砢有節千尺松縱恣天矯其猶龍鍊骨冰雪盡成鏡  
妖魅莫敢藏其蹤有時掀鬚寫衷抱笙鐘細意調清風  
嗟哉斯人不可逢埋沒奇氣儕秋蓬九龍山邊一坏土



日孕琥珀光熊熊

蒙山路君墓誌銘

蒙山之死也兆洛哭之慟已而歎曰才之不善用自禍  
如此夫造物者有意而生之而承之者乃不能善其死  
雖其心事可以暴白于天地行業可以自傳於後世而  
觸於機辟爲見讐者所快同志者所痛悼可悲也夫君  
姓路氏名同申字申宣所居缺於藝事無不能邑史先生  
鑑樓者得高忠憲之遺學動以規矩爲時碩儒蒙山其  
出也才之授以程朱之書遂深明性命之要遍貫串六

經通其大義拘墟皮傅之解一不概于胸中益講求當世之務經國濟用所宜因時通變之規模古名臣所自樹立者要以實見諸設施隱然自任非一世士也而疾邪太嚴遇事太剛自信太果自以爲練於事幾天下無不可形格勢禁而解一發不慎猝與禍會悲夫禍之起也族子鬻其遠祖墓地於富豪君傾身爭之奸吏受賕監司不察憤然具揭其狀大吏因持爲誣罔獄遂不解在獄時著書教子弟接親故宴笑如平時其子爲贖罪已得釋會病作出獄不半日而逝嗟乎古之懷才抱德

遭時无妄其狼籍囹圄有十百於此者矣君猶得斂首足膈下幸矣雖然彼皆有所爲也而君所爲者何也不過而老死自其分而天不赦宥適際此時抑又何耶所著書十餘種積百餘卷皆有獲於理有裨於用子哀褒褒先卒孫三人季弟同戊兆洛女弟夫也兆洛少頗蕩妄接君而寤故常心師焉志君墓不敢爲怨尤之詞責賢者之義也寶山毛嶽生讀其遺書聞其事而傷之因系之以銘詞曰

學峻而文奇氣剛而志直乃爲網罟之權旣脫罪而忽

然可命也其奚悲

荆川錢君墓誌銘

君諱文洵金匱人系出吳越武肅王十五世祖諱缶元世稱易象先生八世祖諱憲明正德甲戌進士官常山縣令曾祖諱袁英以明經官青陽縣教諭文章德行稱於時祖考諱一珠有孝行舉鄉飲介賓考諱士橫博經史富著作屢薦不第舉五子君其季也少豐穎十七而孤服闋欲北上入辭於母母有難色君卽棄舉子業怡顏承志里黨稱孝焉歲不登捐錢米以賑全活甚衆有

天患民病選方製藥施以救之其於恤孤敬寡施衣施  
樽掩骼埋醜諸事告無不應里黨稱仁焉至於祖宗祠  
墓尤所慎重惠山武肅王祠將頌合族修葺之置市廛  
取息以爲繼天台山先世會稽郡王墓將傾圮借族姪  
梅溪往修理之邑有天錫公墓甚廣乃與伯叔兄弟  
協力修理勒石以記又建立家祠增置祭產宗族莫不  
頌其德道光七年四月二十二日卒於家距生於乾隆  
二十四年七月初四日得年六十八國子監生例授儒  
林郎候選布政司理問配侯氏先卒子二林立本俱國

學生孫八人芳縣學生穀府學生曾孫五人將於道光十八年十一月十七日莖君於邑南擘喇灣之新阡芳奉顧光祿臯所爲一傳請銘於予昔人言歸震川負雄文偉筆而其所傳志皆鄉里庸行故無所發其奇夫聖人所重者庸行也所謂欲立立人欲達達人仁之方也仁之所及有大小其爲不失人之本心則一故謂之善行於此能言之卽善言也樂道人善何必奇謹詮次其畧而銘之銘曰

以仁存心設誠致行德之所及非以爲名天維鑒之蕃

昌子孫埏門永閉高原岡湮行當表阡風示斯民

雅安縣知縣錢君墓誌銘

道光十有八年七月二十四日四川雅安縣知縣錢君年五十五卒於官明年其子扶櫬旋里卜十月二十二日與邵孺人合葬于江陰黃山蔣家岩祖塋之側而君門人六承如以狀求予志墓予始主暨陽而君已官於蜀不及相見六生篤行而能文時爲予言君處不堪之貧而能確然自守其勗誨後進極有法度固已心焉企之繼有所索于蜀中人士君能爲宛轉致之頻頻致書

六生言彼中風土極拳拳於民事誠恂雅之儒而通知  
時事者遂依其狀次之曰君姓錢氏諱秉德字亦士號  
復齋江陰之遷鶯里人曾祖佩英祖武勲皆未仕父果  
成以君故贈文林郎母沈氏贈孺人君少卽食貧力學  
年二十一贈君卒家益落授徒以養年二十五受知於  
江陰知縣黃君仲郇冠童子軍以其年補博士弟子員  
嘉慶癸酉舉于鄉明年會試挑取謄錄

今上嗣位之二年議叙得知縣分發四川四年署定遠  
五年署南江七年署射洪旣又署潼川府同知九年授



樂山所在多惠政十二年充四川同考官十三年春猥  
夷不法擾越嶺峩邊情溪君奉檄隨營躬備勞瘁軍食  
無缺八月凱旋

上諭以應升之缺升用十五年調雅安歲饑師保甲法  
以賑城鄉各設粥廠置五色籤以次之授老者以旗而  
先給之民無流亡在任四年卒無子以女兒之子爲子  
君之謁選將行也知君者皆期以大用而竟止于是知  
者其惜之銘曰

寥寥其若狂踽踽又似狷我聞君之風如已見君面質

然試鉛刀屢試能不疲所施雖未光未爲無所施吁嗟乎蒼天伯道乃無兒我題其幽宮俾貞干載期

綏寧縣知縣陳公墓誌銘

公諱新字申華號秋江浙之海鹽人大學士世倌從孫也會祖訂温州府學教授以子世倌贈通議大夫都察院副都御史祖世倌康熙癸巳本省舉人贈承德郎加通判銜綏寧縣知縣父克鑄邑貢生贈承德郎加通判銜綏寧縣知縣公生五歲而孤家豐於貲世父伯玉專之母錢安人食貧以撫輟轉從師就業二十四補弟子

員鄉試不第棄舉業而貿遷家以給亦不廢學三十二  
中式本省鄉試副貢遂就職直隸州州判分發湖南是  
歲乾隆六十年也苗頑方不靖抵省卽委解軍需銀十  
萬兩赴銅山還委署郴州州判卽代理州事隨署永興  
縣事苗事方棘福文襄公奉

命視師調發旁午民夫馬匹硝黃火繩期會火迫而隣  
縣興寧桂陽俱已調赴大營事皆一令兼之又調廣東  
兵萬五千韶州兵五千檄公往迎於韶如期皆辦四月  
還郴州卽委署興寧縣事五月調赴軍營委解軍需銀

十萬兩赴辰州又自辰州解兵米七千石赴銅山嘉慶元年苗平大府以贖勞保舉部議格之仍還郴州越一年以失察所屬脫逃遣犯降一級捐復留省辦發審案件平反疑獄大府引重六年署湘縣丞七年委解軍米赴陝西興安府時興安方有教匪之警逾年乃還九年補茶陵州州判是年江浙水減南運買湖廣米足之委解米十五萬石至京師逶迤困頓迄以全濟十四年保薦卓異十六年升綏寧縣知縣逾年引見到任綏寧距省千五百里接壤廣西貴州苗裔錯居山川險惡風氣

頑悍公悉心撫輯民皆得所十九年檄赴雲南買銅二十一年錢安人卒於家公在雲南聞訃以公事羈留二十三年始奔喪回籍二十五年服闋引見仍補綏寧而公年已六十矣既蒞原任益勤民事亟釐積贖起廢修墜會歲歉設法平糶全活甚衆道光二年以苗疆俸滿加通判銜蒞綏寧凡八年德洽政和撫軍以辰州通判題補而公亟以疾請去官矣士民謳頌爲立去思之碑既歸與羣從子姓爲竹林五老會甚歡又以其間營緝舊居漸復先業自治生壙扁舟往來西湖慧山之間從

容觴咏翛然物外逾六七年以道光十六年九月二十  
二日微疾處分家事坐逝於里第蓋去來如脫屣焉公  
廉而好施窮而歸急而丐貸者推解無所惜工詩歌津  
梁播曳友從流連輒託興寄意而絕不自收拾也大抵  
才畧通敏遇糾紛隨手輒解性復伉爽坦夷不設城府  
故讞獄軍役買銅運米諸事他人惶怯不敢措手者上  
流一相埤益而所向恢然有餘迨息肩一邑視民如家  
政平訟理不事張皇粉飾而百姓熙熙懷而慕思蓋非  
軼掌劬勞不足發公之才非清靜化理不足發公之真

焉耳配彭安人繼配郁安人前卒子七敬祺廣西太平  
府龍州衛照磨彭出敬祚湖北鄖陽府竹西縣典史敬  
祉丁酉科順天舉人揀選知縣前卒希敬道光癸未科  
進士江蘇江陰縣知縣敬福太學生前卒作敬候選未  
入流郁出餘敬側室潘出女一適嘉善謝涑郁出孫十  
二人明鵠福建試用從九品明鳳候選從九品敬祺出  
明鶴候選未入流明珠明安明靜明澹明泊敬祚出明  
皋明稷希敬出明遺作敬出曾孫三其湘明鵠出其沅  
明鳳出其淮明鶴出公旣沒以某年月日葬某山某原

公所自爲生壙也希敬奉公所自撰年譜屬爲誌兆洛  
不敢辭謹差次年月而誌之銘曰

造父之御駑蹇如舞蟻封曲水和鸞協度心閒手調由  
其神宇以此揆務物無能圍以之繕性心皆從矩盤盤  
猗公方員具宜劬勞靡盬勇於有爲行所無事恬以養  
知逸我云老滿志躊躇揮手青雲矧可度思至於神明  
厥有靈爽勒珉日星孰云幽壤

樸菴龐君墓誌銘

君姓龐氏諱煥若字望嶼號樸菴先世居吳江明洪武



初有諱滌者避兵常熟之塘橋遂家焉曾祖全錫祖文源父榕仍世清門榕二子長卽君季曰燦若君七歲入家塾粹然如成人屢困小試援例入太學父將歿以燦若屬之曰若幼撫而成之是在汝也君以故字弟如其身殷摯周悉擇師而教常與其子同舍壯而出分猶權其家事恐廢學也度地祖墓左構屋二十楹爲祠堂奉始遷以下主祀焉又以祠無配主於事亡如存之禮有間於堂後更建五楹以祀各配置祠田百餘畝供修葺費塘橋瀆三丈浦引海潮以溉長二十餘里久不滌漸

涇嘉慶戊辰君謁諸令瘡治之人獲其利已卯壬辰疊  
疏之鄉無旱潦患天災告禮輸其家以助官者四五癸  
未之賑長吏具其事以聞奉

旨議叙九品職銜餘則推以與弟及子姓邑有公事無  
不與焉世所謂善事必躬先之氣和而莊衣冠恒補綻  
澣濯累年不易非祭非賓不設饌速客常言治生不外  
節儉損無益以供有益卽不患匱乏矣故產僅中人而  
利人之事知無不爲爲無不力常若寬然有餘焉道光  
十六年五月十四日卒春秋六十有五配季繼金皆例

則安人再繼金例封安人子四元壘元堦季出元墀元  
均再繼金出孫六俱幼丁亥歲燦若元堦俱已補弟子  
員相携負笈于暨陽書院恂謹力學怡怡如兄弟詢之  
而知其詳知君之誼篤友恭不負先訓也君以道光十  
七年十月廿六日葬於常熟西鄉徐墅鎮東不字號新  
阡元堦奉狀請爲誌墓之文因銘之曰

樂施於家六行有倫則友篤慶敦宗等仁善推所爲成  
物潤身式庇爾後岸谷罔涇

涇縣訓導歸君墓誌銘

君歸姓銜名字受谷號訥甫系出唐兵部尚書忠宣公  
諱崇敬奕世丕顯食邑吳中子孫遂爲吳人宋湖州判  
官罕仁遷常熟之白茆浦六世祖德明復遷城東門五  
世祖起先崇禎進士官刑部主事贈工部尚書高祖允  
哲贈吏部左侍郎曾祖復佺咸安宮教習候選知縣  
旌表孝子祖鏡考景泮

旌表孝義馳贈安徽涇縣訓導君托名胄資庭教亮質  
嶷嶷不與羣兒倫年十五喪贈翁蓋勤學自立問業必  
碩望娶於邵爲叔山先生女孫繼妻呂亦毘陵甲族獲

聞兩家緒論業益博達既值于庠用文義優大吏奏舉  
遂以嘉慶丁卯權金山學篆自是歷署無錫金壇崇明  
後乃授涇縣訓導所至關忠節植善類激拔英秀養容  
中才被其知者多獲成名君資性明練善斷有就謀之  
難險必達爲內外上下所倚重奉已甚約一冠十年遇  
凶飢振貸輒捐多金以倡鄉邦夙重君望樂其倡爭出  
資爲善以此水旱之歲凶而不飢尤篤於宗族割贍族  
之田千畝自同姓以上朝無鬻葬無槥娶嫁無資者無  
不給恐墮宗祀分其私田若干晦日祭田尤懼子弟廢

學破壞軌範益以千畝曰書田爲申狀大吏垂久遠然  
常若自疚有所感觸發爲歌詠號曰知非草嗚呼君之  
志行庶幾古之慥慥君子矣以道光十七年十二月二  
十六日卒年六十有六娶邵氏繼呂氏子四人令喬令  
符令韞令望令喬監生令符廩貢生候選訓導令韞未  
娶卒女子子二人適監生李如霖副貢生陳光适孫男  
四人兆吉兆簪令喬出兆良兆恩令符出將以二十

年 月 日 葬于常熟鎮江門外長田岸穀號新  
阡之昭穴令喬等持狀來曰吾家述揚先緒必當代大

君子如姚姬傳吳穀人阮芸臺孫淵如洪稚存吳山尊  
諸先生並有文章敢求所以不朽吾父者子辭不得次  
其狀係之銘銘曰

出爲士模處亢厥宗輪囷磊節怡怡春融有德式只顯  
顯其崇有慶貽只隆隆其豐在隱而耀用基而鴻光岳  
照載永謚幽宮

方府君墓志銘

府君姓方氏諱聯聚字樹星又字友槎先世湖州德清  
人明永樂時有以錦衣衛指揮使扈蹕入燕者遂籍順

天高祖國棟

本朝江南布政司參議分守蘇松常道有惠政卒於官  
祀名宦曾祖辰翰林院檢討婚於常州徐氏因家焉祖  
宏度大名府教授父徽國子監生

誥贈奉直大夫母江氏贈宜人自檢討以下雖家于常  
而參議檢討皆歸葬順天故府君仍以大興籍補弟子  
員乾隆丙午科中式順天鄉試乙卯以大挑一等分發  
甘肅其年委署安化縣事丁巳署碾伯縣事五月署靖  
遠縣事戊午以教匪滋事調赴軍營己未署禮縣事庚



申署階州直隸州借補王子庄州同未幾調知成縣丙  
寅保薦卓異調知平番縣己巳升靜寧州知州六月丁  
江宜人憂壬申服闋謁選以檢發往廣西癸酉署蒼梧  
縣事凡三月調署柳城縣凡五月又調署羅城縣乙亥  
署永安州事其冬調署寧明州丙子補永康州知州己  
卯以疾請告明年三月得請以五月謝事八月遂卒府  
君敏于從政所至治辦大府倚以任盤錯故奉檄往來  
幾無虛歲所歷州縣無久暫去無不見思者靖遠縣無  
通渠民苦遠汲府君至引泉穿渠環繞城郭提關水門

民以便利罷其瓜果之獻大府怪而索之府君曰縣無  
公田官不治圃不敢以小民衣食自取媚也禮當賊衝  
奉檄之日卽單車之任晝夜宿城上葺濠塹備矢石儲  
糗糧鼓厲兵民誓死以守者九閱月劇賊張漢潮王三  
槐更迭攻之不能勝而邨民爲賊所劫旣而逃歸者數  
萬人田廬悉燬餓且死招來之立其文書請振大府而  
先以城中餘糧作餅粥食之卒得全活有某將軍者將  
兵過禮請休兵於城府君知其衆之不戢也乘城語曰  
賊勢且急恐民驚擾請舍於城外將軍曰我本逐賊且

爲護汝城來何相拒也府君曰若逐賊則賊固不在城  
護城則當在城外卒不納蒼梧風俗窳薄有花艇博場  
菸館誘諸年少諸年少因以爲非竊盜亦由是而不戢  
每新令至卽率金以餽餽卽不問府君旣嚴禁之又搜  
逐之俗用頓改永康州民韋成保兄弟以爭產訐訟府  
君爲開說孝友之道各慙以去頃之復訟者再府君又  
委曲誘勸卒不加刑而大悔悟各讓所有曰公以人類  
待我我乃自比犬彘邪然性彊直出語又伉爽意所不  
可不能爲大府挫嘗奉甘肅布政使委勘會寧災蓋布

政之意以會寧爲非實災以府君爲直故使勘之府君  
至則周行邨落計其災之輕重計戶口之多寡纖悉簿  
錄以還布政曰會寧果災乎府君曰赤地數百里宜急  
振布政曰是會寧令爲汝言耳府君曰某親歷村落十  
日所當振之民皆以白堊書戶口於壁可覆勘也覆勘  
不實與捏災等咎爾布政晒曰如是則可謂詳審矣府  
君曰民命至重疎忽則誠不敢布政卒不能奪然猶悻  
悻曰孔子與上大夫言閭閻如也斯言云何嗚呼府君  
言必達其誠行必如其志仕宦二十三年歷州縣十五

既所在稱治而一列卓異一進官卒老于遠州羈旅而  
死年六十七以嘉慶二十五年八月卒于永康州配馮  
宜人子二履錢嘉慶戊寅

恩科舉人履筠先卒孫一翊良以道光二年正月二十  
一日葬於陽湖縣定安西鄉銘曰

世寶銘刀令莫邪截毛既知其利乃畏其鋒莫之敢操  
不盡其用又相訾訾藏而不光邪蓄而彌昌邪貞諸幽  
扁我則不詔

浙江寧波府知府呂君墓誌銘

公諱子班字仲英姓呂氏系出宋東萊郡侯好問明永樂時諱成者徙常州武進雍正二年析武進爲陽湖今爲陽湖人五世祖宮

皇朝順治丁亥殿試第一太子太保宏文院大學上曾祖考諱廷鷓泰州訓導贈中憲大夫山東濟東泰武臨道祖考諱瀛乾隆甲戌進士山西汾州府同知贈通議大夫安徽按察使司按察使考諱爾禱乾隆癸卯舉人浙江桐鄉縣知縣贈中憲大夫戶部陝西司郎中加二級母蔣太恭人二子長子珏字孟巖君其仲也儀觀豐

碩十一歲能詩桐鄉公居官廉惠士民爲立祠以祀比  
歿任所橐中蕭然君拊搗逾年乃得扶柩以歸益自砥  
於學補縣學生年十九舉京兆試從同鄉編修張臯文  
先生游壬戌會試中式觀政戶部農曹事劇君勤稽綜  
核吏不敢上下其手同司倚賴時方開土方例君主稿  
捐納房慮書吏舞弊詳立章程與庫司互相鉤考後仍  
視爲具文道光十年遂有蔡繩祖案識者服君先見焉  
丁丑充會試同考官戊寅充順天鄉試同考官升貴州  
司員外郎是年

恩詔查豁官員賠欠大農知君才令總辦條定章程詳  
盡有要轉陝西司郎中壬午俸滿特授廣東瓊州府知  
府瓊斗懸海外畱妻孥侍母隻身抵任郡環五指山山  
爲黎人嶽處漢奸入貿易重利盤剝之致釀事端君遇  
黎民交涉之案涉重懲漢奸而後治黎以其罪閭閻清  
謐郡田少不敷民食甲申春風信不時糧價騰踊君檄  
十縣三州卽日開倉平糶而後稟諸大吏又慮倉穀不  
能持久籌款募商買運郡中賴以全濟瓊有軍功厥修  
造督標及龍門等協戰船歷任皆委書吏君慮其偷苟



不能堅實移厥自督之製造必如法時奉蔣太恭人凶問竟不得謝事越明年工畢乃得奔喪服闋奉

旨揀發浙江己丑三月署湖州府事八月署紹興府事庚寅署温州府事土俗五日競渡鄉民各操一舟鬪捷因互毆致命君爲設禁令俗以變革補寧波府知府郡多積案君日坐堂皇其土田錢穀之案必爲核筭明確查閱卷簿手自摘記不假手幕胥旣明且允一經斷結無翻異者壬辰署寧紹台道護理浙江海關時有嘆咭喇國夷船闖入內地聲請就近貿易君至鎮海會提督

勒兵諭以市易有定章不能竄越夷船駛去道有承修  
提標及定黃各標戰船向須賠補故歷任多未修之船  
日久積壓竟有四十餘號君念海捕必須營船足用又  
不得一概咨追前任力請方伯分三年帶脩君再護道  
篆幾二年竟趕修完竣無誤應用癸巳十一月復護寧  
紹台道前任彭年內擢入都有承造金州戰船二隻未  
辦君卽爲刻期興工免其賠累會有御史叅君勒索屬  
員者欽差大臣朱士彥查辦並無此情事覆奏奉  
旨著無庸議君體氣壯盛少有痰疾郡居海濱地斥鹵

積寒濕病見四末卒於任所道光十八年四月二十三日也春秋五十有七君孝友性成待人不設城府言嘯如不出諸口見事有遠識有所籌議下筆數千言洞中窾要爲政一以靜鎮實心任事不以趨蹌便給爲能尤不好名馭屬吏寬和或因公受累必周旋之公事有不合亦不曲徇配崔恭人乾隆辛巳進士荆宜施道龍見女側室張安人子佺孫道光甲午科舉人丙申進士翰林院編修張出佶孫道光乙未科舉人會試挑取臚錄崔出備孫太學生道光丁酉順天鄉試挑取臚錄官孫

道光丁酉科舉人戊戌進士翰林院庶吉士侯孫邑庠  
生俱張出女二長適候選知縣趙鈞謨先卒次卽適鈞  
謨爲繼室孫男五人懋修懋條懋榮懋和懋采嘉慶乙  
丑兆洛始至京邸君亦以補朝考至忝爲同歲生朝夕  
甚相得也比戊辰兆洛以散館外用遂離春明及君選  
瓊州挈眷旋里始一相見自爾日益疎闊比君爲寧波  
守距去里門一水冀得一棹趨黃閣盡數日歡而君赴  
至矣佺孫等奉君狀請爲銘奚宜辭銘曰

君子比德溫其如玉其容恂恂其神穆穆敏以致恭敬

事後祿擾而能毅直而能曲若愚若訕不雕不琢宜力  
中外卓然軌躅精心雪白耐守煩濁地官之司是維金  
穀豪吏蝨胥蠶食聚族其利多孔厥弊誰燭君能先覺  
窒隙杜獄一麾瓊海黎蠻革俗發廩普慈無愧民牧翺  
翔浙水彌若粥粥西海島夷互市所蓄鱣檣熈帆來去  
剽倏突泊鎮海以通市實惕以兵威使知畏縮示以舊  
章立時帖服伊啞樓船是備征逐帥卒司命繕營宜勗  
烏有訑訑委之曹局况苦蹶費曠而不續君亟綜覈躬  
爲簿錄不惜勤勤補其不足龍驤騰川鯨鯢以戮乃有

侍史妄希補牘昌言劾君箚篋不肅時維廷平在浙讞  
獄詢訪衆庶其狀不繙抗章入告皎然如旭修之于躬  
射已之鵠施之於政美不自襮以之爲人慈祥覆育以  
之爲已宣芬散馥德可宜年如何不淑介爾昭明令終  
有俶我文其幽勿湮陵谷

亡兒顓墓志

兒生以五月又多病因呼之曰難少長而魯名之曰顓  
而字以哲望以魯不能竟讀然性甚慈更練勤苦有勞  
辱事必引爲已任會先大夫棄養吾兄獨任家事已久

使兒分其勞遂析產而授之田習聞先大夫暨吾兄型  
范風俗爲一鄉所敬愛心慕效之而不知學術徒以爲  
整齊之而已且又不善與人乃喜于有爲往往爲人所  
欺弄人有訴窮苦乞假率意許諾不能復必百計遂之  
于是輾轉益困今年夏盛澇大蕩圩堤將毀其工落爲  
子里所分築田者洶洶見泛小舟率人徒具木植畚撮  
糗糧護治之奔馳風雨波浪中者累日夜偶漶于隄役  
者昇器物旁過誤撞其腰幾仆驚而不洩遂時時苦漶  
閉九月某日入郡有所治昏而還將登舟舟小簸蕩蹉

而頓傷尾闕骨遂洩血卒不治兒生以嘉慶五年五月八日卒道光十一年十月九日得年三十二娶於吳吾友山子之子能規以正子男四初同武純純生才兩月計兒一生所爲婆娑殆如嬰兒度其心無隱慝初質性似可讀冀償兒負予去年相地曾祖榮之側爲他年歸骨計今以其穴之左先葬焉志之而告之曰其生也顛血氣使然死而形離當返其天此汝所從我而度之阡也去汝高祖父母之兆步武聞耳其代予朝夕定省焉予與汝母已衰老繼往當無幾年汝安之



丁母瞿太宜人墓誌銘

太宜人姓瞿氏武進人雍正乙卯舉人諱純申之子同縣贈大夫丁公諱汝驊之配也年二十一歸于公時君舅按察公罷官家居王姑吳太淑人在堂按察淑人率太宜人先後承事而太宜人爲稚婦婉婉得重閨歡倘不侍側食不甘飽按察居官節廉歿後家無餘財贈公乃謀食四方太宜人持主內政凡食飲祭祀賓客酬酢必弗使之以紓贈公內顧而延師課子尤極忠敬朝夕遣童婢伺師意所欲而謹致之脫簪珥治具弗恤也故

其子四皆以文學發聞及贈公歿而伯子已選拔貢生

有名客授以奉甘旨旋舉甲乙科官河南知縣迎養太

宜人伯子歸而仲子官浙東鹽場大使叔子官湖南知

縣月一遣信使致菽水之奉人謂太宜人年已八十於

是可以頤養休息而太宜人習于勤劬屑屑料量計薪

米權出入與少年時動作不殊又十年伯仲二子相繼

下世叔子乞養歸季子奉檄官山東知縣太宜人雖毫

老神明不衰猶擘畫家事如昔蓋後贈公四十三年而

卒卒之三年道光壬辰十二月壬戌孫嘉洛等奉其柩

合葬于豐西鄉贈公之兆乞爲銘余辱與諸子交不敢  
辭太宜人卒於道光十年十月二十九日享年九十有  
三

敕封孺人晉封太宜人贈公國學生績學種文十應省  
試不售歿于福建以伯子貴贈文林郎晉贈奉政大夫  
子四履泰嘉慶己未進士翰林院庶吉士河南葉縣知  
縣候選府同知履益實錄館謄錄浙江鳴鶴場大使皆  
前太宜人卒照嘉慶戊午順天解元湖南零陵縣知縣  
履恒選拔貢生贛榆縣教諭山東肥城縣知縣女子四

句容縣學生王慶慈河間縣典史同縣黃應中其壻也  
二人未嫁卒孫六人曾孫七人嗚呼太宜人爲婦爲母  
之道可謂善矣天之所以報之者亦不可謂不厚乃垂  
歿之年而先奪其二子使不得送其終人事固多缺陷  
哉銘曰

維昔之友拜母登堂維母之儀寢門不張孝慈合恭六  
媼所望旣膺翟茀亦膺壽考胡福不完終成地道子子  
孫孫是則是儆滌滌高原陳陳吉壤爲君子墳爲賢母  
藏桑海有變阡表不亡

祝母湯孺人附誌

炳季以道光十年卒吳江吳育山子爲之墓誌以未得吉卜壘淹其期逾五年而配湯孺人卒乃合葬於某原會山子遊中州星槎等奉狀屬予爲誌墓不兩誌古也故最其狀附炳季誌後狀曰孺人湯氏父廷枚國子生孺人二十二而歸于祝翁儒林君居貧有急逋無以償心憂之孺人方來歸微侍顏色得之卽屏奩資質以奉炳季常出遊家事一倚孺人色養備至翁固好飲度不能得酒卽詭言不欲孺人携罌置翁所時益其酒翁窺

罌酒常滿輒樂飲翁之歿炳季暨伯氏子常皆遠遊姒  
婦又劇病含殮事孺人獨治之無不如禮家徒壁立兒  
女滿前一切衣食日用及婚嫁事拮据治辦炳季不問  
也人羨炳季有嘉耦焉卒以道光十五年十二月二十  
二日年七十丈夫子六二殤星槎娶黃氏繼薛氏雲槎  
娶程氏斌後族叔保賢九來縣學生娶沙氏女二長適  
附貢生章燧次適章政平孫八人銘曰

夫扶妻齊內助急焉無成有終地道宜然懿歟女士宜  
儷君子千秋同藏無有圯毀

墓表

汪快士先生墓表

甘泉汪喜孫以其高祖快士先生之狀抵余曰君安貧  
樂道不求仕進性豪宕喜遊山水凡名勝之地無不歷  
也善刻印價其資以爲裹糧計得盡遊而已先世居歙  
之古唐村晚年僑寓江都遂家焉所刻印有紅木軒山  
水篆冊桐城張文端公嘗序之有紅木軒印範晚年所  
輟也著紫泥法仁和王丹麓睥檀几叢書刻之嘗謂字  
書自說文以後紛然襍出集古今文字爲文字源生前

明某年卒本朝康熙某年年六十有九葬甘泉縣金匱  
山娶鄭氏子良溥良沛良澤乞爲銘幽之文予惟古墓  
誌之石與棺俱下未有葬越百年而爲之者謹據狀爲  
之表曰古有隱德之士避時獨處諱其道晦其身藏于  
技以自鬻者雖至賤弗恤也先生旣肆志于山水之間  
復憫小學之亂雜奮然著書先生曾孫容甫先生以博  
學工文詞稱雄於當世余讀述學內外篇恨不捧手受  
教及見喜孫而喜其能世其業也先生諱鎬京號西谷  
容甫先生名中



大城縣尉陶君墓表

中書陶君際堯奉其先贈君春溪公之狀謁予而言曰  
先府君三十而從宦六十而歸休際堯之生也府君年  
六十有四府君之棄諸孤也際堯年二十有一於府君  
從宦事蹟不能詳所覩記者居里黨宗族間事而又不  
能窺見旨意規模精神徒以籍籍人口者綴其大凡耳  
今距府君棄養之日已二十年際堯僥倖舉京兆捷南  
宮入中書府君不及見也遭逢

皇上登極覃恩制誥追贈思古人捧檄之喜彌增摧裂

將礮石墓道以紀

思遇且志其無窮之悲願吾子之有以表吾先人也余  
既受狀而讀之而復於陶君曰歸熙甫爲贈檢討許君  
墓表惓惓於天厚有德將興其家不當其身而特鍾於  
其子許君者文穆公國之考也文穆始入翰苑而屬熙  
甫爲墓表之文厥後文穆躋台輔爲名臣皆如其言許  
君布衣特以行誼著稱非如尊贈君所至有宦蹟利澤  
及於人也君將恢合緒光大餘慶其不爲文穆乎哉按  
狀贈君諱兆麋字拱之春溪其自號也世爲會稽人著

清望贈君至性肫篤父華峯公病嚙指血書疏以禱剖  
肱肉和藥進之病以霍然尙氣節重然諾讀書不事章  
句而制舉業下筆輒屈其儕偶遊句山太僕之門稱高  
足弟子旣屢困場屋謀祿養援例得直隸深澤縣尉繼  
以改近安徽宣城歷尉歙盱眙丁內艱起復補直隸大  
城尉所至有聲績其在深澤也澆水溢壞民田廬爲疏  
其壅洩其漲築堤捍之日捐捐泥淖中不恤也其在歙  
也邑有名宦號半升太守乃贈君六世從祖比贈君涖  
邑亦以清惠著民因並頌之在大城尤一意釐剔奸宄

邑無賴子相絜博戲監生王倬爲之囊橐悉捕治坐襍  
革者十餘人生員李某與太監劉某有連倚勢暴鄉里  
發其奸杖而徒之以此不中上司意遂棄官歸其強直  
剛毅如此家居二十餘年誘掖後進如恐不及家無中  
人產而喜賑恤乏困里中有忿爭輒就取正得片言無  
不立解者伯兄早卒嚴事孀嫂撫其子女迄成立弟某  
尉良鄉旣罷官迎之同居晨夕怡怡有兒無常父衣無  
常主之風配袁孺人繼配俞孺人贈君以嘉慶二年丁  
巳卒年八十五俞孺人道光甲申卒年七十八以道光

某年月日合葬于會稽小路山左過龍山之原子四人  
際華桐城縣尉際唐鴻臚寺序班際堯其季也嘉慶丁  
丑進士內閣中書孫一人曾孫三人贈君之所措施未  
盡其用卽所著見一二固亦無媿于古人矣則天之所  
以使其保世滋大也豈偶然哉謹詳列之俾揭諸墓道  
云

許州知州容谷何公墓表

山陰峽山何氏系元至正時紹興路提舉茂昌倡義勇  
衛鄉里遂定居焉仍世爲方雅族傳十有四世而至許

州知州容谷公公諱熊光字孔照祖贈奉直大夫師吉  
父贈奉直大夫其棟母徐宜人娠十五月而生公少負  
異稟八歲能誦陸宣公奏議長益勵學綜究古今治亂  
所由於政治典章刑禁禮俗之沿革利害釐然於胸確  
然可運諸掌而尤諳悉當代掌故因時勢俯仰者乃佐  
幕以試于用藉其摺爲仰事資十九歲游浙江歷佐金  
華永康江山東陽諸縣所至委心椿二十八歲游汴梁  
祥符合魏獅劇吏也有獄不能決聞公名質之公援筆  
論意察情傳律輕重比不失銖黍譽日起按察使陳公

奉茲延之幕中嗣是陳臬豫中者相競致公四十歲始以議叙縣丞投効東河會河決曹州以勞績叙知縣尋入豫撫馬公慧裕幕奏請留豫補用河再決衡家樓以堵築功加知州銜題補濬縣知縣未歲調署杞縣閱四年調祥符縣年餘升光州直隸州知州閱二年署開封府知府時滑縣賊李文成據城反大兵圍之統兵諸大帥知公練事調赴軍旣平滑隨大帥追勦餘賊于南山又調赴懿厓大營以軍功奉

旨以知府升用旣還豫又檄辦軍需善後事宜將奏補

懷慶府以酬公勞是歲光州旱公曰民方仰官以活不可力辭還光州請碾倉穀以賑大府格以成例公曰飢民如病兒斷乳立死可坐視乎卽發倉設厰食餓者而以擅動常平自劾大府謝焉其秋徐宜人卒於光州署會雖工興築方殷大府檄委公總河局責以金革無避之義墨經視事者二年始回籍治塋喪畢赴豫卽隨大府歷禹州汝州光州固始滑縣察餘匪讞部獄明年補許州直隸知州未兩月復調辦沁工管總局渡黃河駐滎澤又赴衛輝勘武陟勘虞城諸工畫卽據鞍宵卽



據儿口摠翰墨無晷漏洩八月還許州以勞積疾劇十月六日卒于署嘉慶二十三年也年六十公綜貫吏事又工章奏大府倚之故所泄未久卽調惟在杞四年在光三年而其間以商畧事會鞠重案輒調之歲輒十數往來而民事無片牘倚閣者又在豫久周知民隱地治能宛轉以應呼籲故去而見思當佐幕時楚匪蠢動且竄豫臬使陳公文緯集兵南陽新野間息縣解叛人之從坐者多道亡羣請剔其脛公曰殘肢體非法也且其中安保無善良力沮之而請分別其脅從及誣枉者賊

聞之爭自拔歸豫以不擾平居喜讀書聚書數萬卷暇  
輒丹黃之延碩師以課子而爲之擇友陶際堯陳實甫  
皆讀書于光州官閣者也子一士祁道光辛巳

恩科舉人壬午進士補江蘇常熟縣知縣今調元和縣  
所泣有治聲能肖公以嘉慶庚辰葬公於馬面山之原  
閱十二年乃以書奉行狀請爲銘幽之文兆洛念藏不  
再啟銘無補理公之生平又已具張刺史作楠所爲狀  
竊以爲世之需才如屋需匠方圓大小由之曲成事旣  
得集而居者忘其庇公之應務無施不宜固得之于周

歷抑其得之於學問者深矣惜所施尙未盡其才焉謹表其大端揭諸墓道示天下之抱才以應時需者

墓碑

國子監生王君碑

君諱曰旦字殿章又字學愚徽州歙人也啟胄姬宗代有明德考諱震布政司理問潛耀未升純明內融以衛賜之屢中綜計然之七策遂縮鹽賦買遷毘陵柔而不犯廉而不劌比黨蒙福縉紳歸高焉君承方雅之夙緒膺休和之茂姿孝乎惟孝友于兄弟其承志也視于無

形其忘勞也施於不匱哲昆悼喪孤嗣眇然卵而翼之  
而治其室實有第五倫十起之恩用成欒子旗不茂之  
茂理問捐館孽子在祿顧復出入時靡不周父之師之  
迄有成立嘗戒其子曰骨肉一本非二身也若懷彼我  
是謂忘親雍雍焉秩秩焉醇意接而生時和理出乎其  
性者哉其於人也順事明恕欲仁斯仁姬咻痛疾匪徒  
急難來者每溢其望往者常忘其施而束身潔操惟義  
之由正直爲正正曲爲直言不枝葉行無詭隨是以韋  
素之士仰模則而奉手聆嘉聲而響附矣若其優游執

林周覽博涉虛室廓然良書自得高朋萃止賦詩卒貺  
甄稽圖史品藻卉木莫不適合而發達乎自然取暢懷  
抱非求飾衆道足以揆務而藏用是葆行足以高世而  
和光若愚蔬足以成名而抱璞爲式蓋才不偶命位不  
疇德超然忘華競之心焉景命胡惜不登期者年五十  
有四以嘉慶十四年正月十日卒權窆於毘陵之某原  
二三友生潛焉疚懷悼心失圖綴述景行流播芳烈者  
不謀同聲累牘未已長嗣國棟銜哀永慕久而彌篤將  
奉柩柎歸從先人之兆於黃山昔高卿聘君叔則處士

生不膺仕沒垂令名咸題豐碑以應典禮雖德非伯始  
學慙中郎慕贇章往其致則一詞曰

嗟茲王君厥德克明動無飾行言不脩名養志致歡順  
于闡庭因心孔懷敦本作程見善斯徒聞過則更博施  
及物陳義耕情總文列藻如春有榮正身履道如秋載  
成渾兮若濁動之徐清谷兮若虛挹之徐盈聖人所思  
得見有恒懿此耿介邱園之貞休光允鑠餘慶宜繩不  
著遺譽來裔聰聽